

Roma

Paulo âiŋaet keiŋe.

¹ Galalupne, nâmâ Paulo Yesu Kristogât hon bawa manman. Nâ âmâ Kristone menekmâ aposolo nogonmâ Anutugât pat âlep den mak-tere ârândân akmâ ariâkgât mem kepilânegep.

² Akto Anutugât den pat âlep are âmâ Anutune tâmbâŋe dondâ propetelupŋe makyenŋimbo kulemgoyi. ³ Kulemgoyi aregât keiŋe amâ Anutugât nanŋe miawagep. Yâk âmâ hâk olop miawakmâ Dawidigât hakulupŋe yâk yengâlânba miawagep.

⁴ Gârâmâ Heak han kau kau akmap arekŋe kârikŋe akmâ yâk amâ Anutugât nanŋe hain miawakmâ maknengiep. Aregât keiŋe momonânba agalewân miawakmâ tek tekŋân miawakto âmâ Yesu Kristo amâ Humonenŋe dâm nânŋâyion.

⁵ Yâkŋe âmâ han kalem aknengim aposologât âi nengiep. Nengim âmâ yâkgât kotŋe patŋe ariâk gât akto hânŋe hânŋe arim hârok makyenŋienŋe bikŋande nânŋâm Yesu nânŋarŋmâ aregât launŋe lokowaigât âi nengiep.

⁶ Akto Anutune Yesu Kristogât kâmot miawagâk dâm oloŋyegep yâk yengâlânba ye gai hainâk oloŋyegep.

⁷ Roma kepihan gâtŋe Anutune han kalem akyenŋim nânŋât kâmot dâm yengonlep. Yengât âmâ hin ulilandân. Ewenenŋe Anutu akto Humonenŋe Yesu Kristo han kalem akmâ damun yengim akbela han kalem akto lumbe yengâlân hâtikom yendo biwiyeŋe sândugewiâp. Hain.

Pauloŋe Roma luâk âmbâle yekberâm magep.

⁸ Galalupne yeŋe Yesu nânŋaŋmâ kepilâm manmai, aregât pat sambelembo nânŋâmbiâ ârândân aktâpŋât Yesu Kristogât akmâ nâ Anutu mepaiŋe mem mandân. ⁹ Nâ Anutugât nanŋaet pat âlep den makmâ hannande Anutu manaŋdere keine nânŋâp gât yâkŋât metenân den ire makyenŋire nânŋâŋet. ¹⁰ Nâ hokboâk hokboâk yeŋât akmâ Anutu ulilaŋman. Akto Anutuŋe nânŋâmbo ârândân akto dâp peneniŋdo yeŋâlân togowian a gai ulilaŋman. ¹¹ Nâ togom ye yekbiangât nânŋâm mandân. Togom yekmâ han biwiyeŋe yeuk agep aregât owâiwaigât meme akyenŋire kârikŋe kinmâ manŋetgât makyenŋim tânyenŋuwian. ¹² Tânyenŋum âmâ nâ yeŋâlân manmâ tatere Yesu nânŋaŋmâ manmaengât magaŋgi goaŋgi akmâ tân agu agu akmâ manbaen.

¹³ Galama, nânŋât keine pâpkowâigât hin makyenŋiwe. Nâ luâk kâmotŋe kâmotŋe bikŋe bikŋe arim makyenŋim mandere bikŋande nânŋâmbiâ âinaet bunŋe âlim yiepgât miawakniŋep. Are hainâgâk yeŋâlân togom makyenŋire âigât bunŋe miawakniŋbiap gât nânŋân. Gârâmâ togowerâm akmâ malân ain siâ siâ bikŋande hikonekto bo togoân. ¹⁴ Dâ nâŋe luâk hârok, Girik luâk akto Anutu bonânŋaŋmai akto nânŋâ nânŋâ luâk akto koparŋe hârok makyenŋiwian gât âi tatniŋdâp aregâlâk nânŋân. ¹⁵ Aregât Roma luâk ye hainâgâk pat âlep makyenŋiwierâm hannande owâim manman. ¹⁶ Nâ den pat âlepgât akmâ aŋunŋe olop bo akman. Akmâ nânŋâre aŋunŋe olop bo akmap. Den pat âlepŋe amâ

Anutugât kârikneje olowâk arekne luâk âmbâle Yesu nânğanbiâ ârândân mem menjâleyekbiap, Yuda luâk a soj akto Girik luâk hârok. ¹⁷ Den pat âlep arekne âmâ Anutugât ârândân dâp mem miawakmâ tek tekjân miawakmâ katmap. Amâ hin. Yesu nânğanbiâ âmâ Anutuje yekto ârândân akbiapgât keije. Akto nânğanbiâ Anutugât ârândân dâp yem âgâwiap. Aregât Anutuje makto kulemgoyi bikne hin tatâp, Anutuje yekto ârândân akmap yâkne âmâ Anutugâlâk nânğanmâ manmâ âgâwai.

Luâk hârokne Anutu hamianji.

¹⁸ Anutugât kuk miawakmap aregât keije hin. Luâk âmbâleje âmâ Anutu hepunmâ bâleje akmâ den bunje bo agâkgât kei dâpne gulip komai. Aregât Anutugât kukjande himbimân ba miawakyengimap. ¹⁹ Akto Anutuje ikiye keije bikne tekteknân mem miawakyengimapgât ekmâ nânğâmai. ²⁰ Amâ Anutuje hân liulewânbak Anutugât keije luâkne bo ekmai are akto keije kârikne manmâ âgâwiap are akto ikiye keije pagaleje are hârok miapjân tatmap. Are âmâ wan me wan Anutuje mângim ketuguep arekne hekatnengimap. Aregât luâk âmbâle hârokne nen Anutugât keije bo nânğâmaen dâwaigât dâp bo tatâp. ²¹ Luâk âmbâle hainare âmâ Anutu mandâp nânğâmai. Gârâmâ imâ Anutu Humo dâm bo kângoanmai akto mepaije bo meanmai. Anutu hamianmaigât nânğâ nânğâ yeje gulip akmap akto biwiyeye hândâkne katip yengumap. ²² Akto ainba hin dâmai, “Nen nânğâ nânğâ nenje humo aktâp.” dâmai amâ nânğâm hilipkomai.

Nângâm hilipkom sinduk akmâ manmai. ²³ Hain akmâ manmâ Anutu manman kârikņe yâkgât pagalenęe hâkâņ akmâ âmâ aregât dumnân tukup siâ ketugum luâk momai yengât otneyeņe me lâut gât otneņe me sonęo gât otneņe me mulumgât otneņe mângim âmâ are nâņgâmbiâ humo akto pâwut ligiyengimai. ²⁴ Hain akbiâ Anutuņe yekmâ hâkâņ akyengimbo hanyeņe egâlianę gulip bâleņe akmâ han hâkyeņe mem bâlimai. ²⁵ Yâkņe Anutu bundâk amboņe hamianmâ âmâ hianęimaigât nâņgâmbiâ humo akmap. Hain akto Anutuņe wan me wan yân liulep are nâņgâmbiâ bunęe akto honę aganęmai gârâmâ wan me wan aregât Amboņe amâ hâkâņ akmâ hamianęmai. Amâ Anutuņe egâlianę olop manmâ âgâambo nâņganędenęe humo akmâ âgâwiapgât ârândâņ akmap. A bundâk. ²⁶ Gârâmâ luâk âmbâle are Anutuņe hepunyekto egâlianę bâleņe dondâ penianęmai. Hain akto âmbâleņe luâkdâ âmbendâ aregât agak meme âlepņe are hepunmâ âmbâleâk egâlianęmai. ²⁷ Akto luâk hainâk luâkdâ âmbendâ manman hâkâņ akmâ hanyeņe egâlianęgât kâlâp humo ondo luâgâk yekmâ egâlianęmâ agak meme bâleņe aganęimai. Aregât han biwiyeņe hilip komapgât hâuņe Anutuņe hâkyeņân pando hâk hilâlâm nâņgâmai. ²⁸ Hain akmâ manmâ âmâ Anutugât keiņe nâņgâmai are hâkâņ akmâ manmaigât Anutuņe hanyeņe gisap kombo siâ me siâ bo agakņe are âmâ akmai. ²⁹ Hain akmâ siâ me siâ bâleņe keiņe keiņe membiâ âgâmap. Bâleņe akmâ egâlianę bâleņe akmâ hanyeņân bâleņeâk nâņgâm galagât nâņgâmbiâ gembo kuk henęân akmâ luâk bikņe

yeŋgumbiâ moyi dâ bikŋe yeŋgât kotyeŋe mem bâlimai. Akto galagât hogo hogo akmâ hamiŋângen makmai. ³⁰ Hain akmâ luâk siâgât agak meme âlepŋe ekbiâ gembo hianŋi den makbiâ kotŋe gemap. Hain akmâ Anutu gasa aganmai. Akto âgâ âgâŋe akmâ yeŋe hâk mem agatmâ bâleŋaet dâp egâlianmai. Hain akmâ ewe memelupyŋaet den komai. ³¹ Hain akmâ han nâŋgâ nâŋgâ bâlâk manmâ Anutu bo nâŋganmâ âmâ han kalem bâlâk manmai. ³² Hain akmâ âmâ Anutugât den ârândâŋ kârikŋe yendâp amâ luâk me âmbâle hain akbiâ âmâ momogât dâp miawakyenŋiwiap gât den are nâŋgâm metembiâ hanâk dâm bâleŋeâk manmâ âgâmai. Akto areâk bo. Bikŋande hainâk akbiâ nâŋgâmbiâ humo akto heronŋe akyenŋimai.

2

Bâleŋaet hâuŋe hamepŋe.

¹ Aregât gâ yu kulengoân are oyanmâ nâ hain bo akman dât mon? Hain bo. Yeŋe hain are akmâ siânba hâkyeŋe tunbiâ âmâ bo ârândâŋ akmap. Akto yeŋe siânba hâkyeŋe tunmâ agak meme bâleŋe hainâk mem âmâ yeŋe hâkyeŋe tunanŋiwai. ² Anutuŋe luâk âmbâle bâleŋe akmai denân katyekmâ hâuŋe umatŋe yeŋgimbo âmâ ârândâŋ akmap nâŋgâmaen. ³ Aregât gâ luâgâk aregât luâk bikŋe yeŋgât dosa makmâ hâkyeŋe tunmâ areâk akmat gârâmâ agak meme bâleŋe hainâk akmat. Aregât nâ Anutuŋe gâunniŋmâ âmâ umatŋân bo katnekbiap dâmat mon? Hain bo. ⁴ Anutuŋe han kalem akmâ unsambe akŋinmâ bo hâkâŋ giŋmap aregât hâkâŋ akmâ manmat mon? Anutuŋe gâ

hange purik kat dâm han kalem akgiṅmap are bo nâṅgâm kotgâmat mon? ⁵ Gârâmâ gâ han kârik akmâ hange bo purikatmenâ âmâ Anutugât kuk metṅe ârândân are miawakbiawân ain om bâligekbiap. ⁶ Aregât sopṅân Anutuṅe luâk âmbâle agak meme nenjaet dowân hâuṅe nengiwiap. Hain. ⁷ Luâk âmbâle bikṅande âmâ pagalenjaet pat akto Anutuṅe nenekto huraguâkgât manman kârikṅe egâlianmai are Anutuṅe manman kârikṅe yeṅgiwiap. ⁸ Dâ luâk âmbâle bikṅe âmâ den kautṅe bunṅe hâkân akmâ âmâ bâleṅe mem manne dâm yeṅjaet nâṅgâmbiâ humo akmap yeṅgâlân âmâ kuk metṅe bâleṅe miawak yeṅgiwiap. ⁹ Bâleṅe meme luâk hârok Yuda luâk soṅ akto Yuda gâtṅe bo manmai gai yeṅgâlân sik sererek metṅe akto hamep humo miawakyeṅgiwiap. ¹⁰ Gârâmâ ârândân akmâ manbai hârok Yuda luâk are akto Yuda luâk bo manmai yâk Anutuṅe pagaleṅe yeṅgimbo biwiyeṅe sândugembo patyeṅe ârândân akmâ âgâwiap. ¹¹ Are amâ Anutuṅe yeṅgiep. Anutuṅe amâ horat gorat bo akmâ potat yekmap.

¹² Akto luâk âmbâle bikṅe Anutugât den kârikṅe Moseṅe kulengoep den are bâlâk manmâ âmâ bâleṅe memai amâ yâk hârok den kârikṅe bâlâk bâlim metewai. Dâ den kârikṅe olop manmâ bâleṅe memai yâk hârok den kârikṅeṅe agak memeyeṅe mem miawakyeṅgim den âiân makmâ katyekmâ kotgâyeṅgiwiap. ¹³ Aregât keiṅe hin. Anutugât den kârikṅe yân ondop yeṅân nâṅgâwai yâk âmâ Anutuṅe yekto ârândân bo akmap. Gârâmâ nâṅgâm lokomai yâk âmâ ye ârândân dâm makyṅgiwiap. ¹⁴ Akto Yuda luâk âmbâle bo

manmai yâk den kârikne bâlâk manmai gârâmâ hanyenande den kârikne lokom âmâ den kârikne bâlâk arekne den kârikne olop tirip hainare akmai. ¹⁵ Hain akbiâ âmâ den kârikne han biwiyenân yonâk talep aregât keiņe miawakmap. Akto hanyenân tuk tuk koyengim âmâ nângâ nângâyenande purik gurik akmâ siân kotgâ akmap dâ siân makmâ mulunyekmap. ¹⁶ Are amâ sop humoân âmâ Anutuņe Yesu Kристо agando han nenjân siâ me siâ tiwân yendâp aregât keiņe mem tektekņân miap katbiap. Aregât keiņe amâ nâ den pat makyengiman a hainâk tektekņân miawakbiap. Hain.

Yuda luâk âmbâleņe Mosegât denņe bo lokoyi.

¹⁷ Akto Yuda luâk gâ hin dâmat mon? Nâmâ Anutuņe menekmâ ikiņe den kârikne are niņep gât nângâre humo aktâp dâmat aregât hin makgiņbe. ¹⁸ Gâ Anutugât lau den nângâmat akto bikņande den kârikne aregât keiņe makgiņi aregât ire agakņe ire bo agakņe nângâm potatmat. ¹⁹ Hain akmâ âmâ gugaet hin dâmat, “Nâ dewun yeņe bokbokņe manmai are âlepņe kewugu yekmâ dâwân kat yekman, akto hândâkņân manmai are âlepņe mem pagaleyekman, ²⁰ akto luâk han kopaņe are âlepņe manmâ miwindik yekman akto nanaņ siâ me siâ âlepņe dâp hekat yeņgiman, akto den kârikne aregât keiņe amâ nângâ nângâ akto den bunņe aregât keiņe tatmap dâmat mon?” ²¹ Gâ hain makmat aregât luâk âmbâle bikņe makyengim âmâ guge biwige bo maganmat. Gâ kâmbu bo mem dâm makyengimat guge kâmbu akmat mon? ²² Luâkdâ âmbendâ bo hepun akņet

dâm makyenjim benje gâ âmbenge hepunmat mon? Gâ lâpio sârekomatje lâpio opmânjaet siâ me siâ kâmbu memmat mon? ²³ Gâ Anutugât den kârikje nângâman dâmat amâ bo lokomat aregât bikñande gekmâ Anutugât den nângâmbiâ gemap. ²⁴ Aregât Anutugât den kulemgoyi bikje hin tatâp, “Ye Yuda luâk âmbâleje bâleje akbiâ aregât Yuda luâk âmbâle bo manmai arekje yekmâ Anutugât kotje makmâ sârek kombiâ gemap.”

²⁵ Gâ hâkgân Yudagât tirip tatgiñdâp are den kârikje lokomenâ bunje aktâp. Dâ den kârikje lonğaimbiâ âmâ hâkge gâiyi are yânje akbiap. ²⁶ Gârâmâ aregât Yuda tirip bâlâk manmai arekje Anutugât den lokom âmâ tiripdâ hainare akbai. ²⁷ Hain akmâ tirip bâlâk manmapje den kârikje lokomap yâkje âmâ keige gagaiwiap. Gagaim âmâ gâ Anutugât den kârikje nângâmat akto Yudagât tirip olop manmat gâ den kârikje lonğaimat aregât hâkge tunmâ keige gagaiwiap. ²⁸ Aregât lâuwâje makbe. Luâk siâ yân hâkje Yuda luâk tirip akbiap amâ hâkjeak manbiap. Hain arekje Yuda luâk bunje bo akbiap. ²⁹ Amâ hanje Yuda luâk arekje bunje akbiap. Amâ Yuda luâk arekje hanjân tirip bunje akmap yâkgât amâ Yuda luâk bunje dâmaen. Dâ hâkñân den kârikjegât tirip areâk mem manmap are bunje bo. Gârâmâ han biwiñân tirip mem manmap arekje amâ Yuda luâk bunje dâmaen. Yâk hain aregât heronje amâ luâkgât bo. Anutunje nângâmbo âlepje akbiapgât.

3

Agak meme bâleñande Anutugât den bo kombiap.

¹ Akto yu kulemgoân are oyaŋmâ âmâ Yuda luâk âmbâleŋe âmâ Yuda gâtŋe bo are bo ewangiyek-baen dâi mon? Me Yuda tirip are yânŋe aktâp dâi mon? ² Hain bo dâwei, Yuda luâk âmâ siâ me siâ biwirâ yeyenŋiep. Yâk âmâ Anutuŋe den pat keiŋe keiŋe makyenŋimbo aregât amboŋe agi. ³ Gârâmâ Yuda luâk âmbâle bikŋande Anutu hanyenŋande bo nânŋaŋbiâ aregât hin dâwaen mon? Bo nânŋaŋbiâ aregât Anutuŋe makto den kârikŋe tatmâ gaep are mem bâliâi hain dâwaen mon? ⁴ Are bo dondâŋe. Anutuŋe makto siâŋe hin kulemgoep,

Anutu, gâ makmenâ âmâ denge bunŋe ârândânŋâk akbiâp, are nânŋaenŋe huraguwiap. Akto gâ makmâ kotgâ akmâ potatmenâ âmâ siâŋe denge bo mendo gewiâp. Den are bunŋe akto luâk âmbâle hârokŋe hianŋimai akto Anutuŋe konok âmâ bundâk makmap keiŋe are miawaktâp.

⁵ Are oyaŋmâ gain dâwaen? Bâleŋe nenŋande Anutu ârândânŋ manmanŋaet keiŋe mem miap panmapgât bâleŋe aktenŋe Anutuŋe aregât hâuŋe nengimbo ârândânŋ bo akbiap dâwaen mon? Den are amâ luâk nânŋâ nânŋâgât dowân maktân.

⁶ Hain bo dondâ. Anutuŋe bâleŋe nenŋaet hâuŋe bo nengimap dâine gain gain akmâ luâk âmbâle hârok nengât agak memenenŋe bâleŋe are mem kepilâwâi? ⁷ Aregât siâŋe hin dâwiap mon? Hianŋi dennande Anutugât den bunŋe tângombo kotŋe patŋe are humo akmâ sambelewiap, aregât wangât Anutuŋe nâ bâleŋe agângât hâuŋe niŋmap? Amâ bo ârândânŋ akmap. ⁸ Akto bâleŋân mandenŋe purik âgâm bunŋe âlepŋe miawakbiap mon? Nen âmâ hain bo dâmaen gârâmâ luâk bikŋande

âmâ Paulomanje hain dâmai dâyi. Aregât hâuñe miawakyeñgimbo ârândâñ akbiap. ⁹ Aregât gain gain nâñgâm heñgemgowaen? Yuda luâkñe luâk bikñe ewangiyekmaen mon? Bo dondâ. Emelâk maktân. Yuda luâk akto Yuda luâk bo nen hârok bâleñaet hoñ manmaen. ¹⁰ Aregât Anutugât den hin tatâp,

“Luâk âmbâle siâ ârândâñ siâ bo mandâp. Bo dondâñe. ¹¹ Hârokñe agak meme âlepñaet keiñe bo nâñgâmai. Akto hârokñe Anutu konmâ kulâgâtâmâ bo akmai. ¹² Luâk hârokñe Anutu hamiañmâ bâleñe akmâ hâkñe hâkñe agi. Siâñe siâ me siâ âlepñe bo akmap. Bo dondâñe. ¹³ Hanyeñe are momoñe yeñgât dop. Elewetyeñe purik dâambo hiañgi den gamap. Biwityeñande âmâ hâme hewukgât kundat bâleñe mem miawâk panmap. ¹⁴ Lauyeñân âmâ sait akto gasagât den pikmâ lugum lokom yemap. ¹⁵ Luâk yeñguenñe moñet dâm aregât keiyenande owâiñeâk tâlimai. ¹⁶ Akto itij gulam meyekmâ welam yeñeâk mem miap panmai. ¹⁷ Akto han biwi konok manbiâ biwiyenye sândugewiapgât pat bo nâñgâmai. ¹⁸ Akto Anutu bo nâñgañmâ yâkgât hamep bo akmai.” are amâ Anutugât denñe maktâp.

¹⁹ Aregât keiñe hin. Den kârikñe arekñe den kârikñe nâñgâmaen nen damun nenñe akmap. Arekñeak keinenne gagaim, lau nenñe gisapkomap. Akto luâk hârok dosanenñe Anutugâlân miawakmâ metemap. ²⁰ Aregât den kârikñe lokone dâm âi humo mendenñe Anutuñe nenekto bo ârândâñ akmap. Hain gârâmâ benñe den

kârikne arekne dosa nenne mem miap panmap. Hain.

Anutuŋe nenekto ârândâŋ akmapgât den.

²¹ Dâ hinne âmâ Anutuŋe nenekmâ dosayeŋe bo dâwiapgât dâp miawagân miawaktâp. I are âmâ den kârikne lokowaengât dop bo. Gârâmâ den kârikne akto propeteŋe kulemgoyi den arekne makmâ miawagep. ²² Anutuŋe nenekto ârândâŋ akbiapgât dâp amâ nen Yesu Kristo nâŋgaŋmaen nengât hârok. Siâŋe me siâŋe Yesu Kristo nâŋgaŋdo ainâk ârândâŋgât dâp miawagaŋmap. ²³ Akto emelâk nen hârokne bâleŋe akmâ dosagât pat agion, aregât Anutugât egâlian pagalenân ari-waengât dop bo tatnengiep. ²⁴ Aregât hainâk nen hârok Yesu Kristoŋe bâleŋe nenne miepgât Anutuŋe han kalemjaet akmâ dosa bâlâk dâm menenekmap. ²⁵ Anutuŋe dâambo Yesuŋe bâleŋe nenjaet akmâ sumbe kato Anutuŋe kuk agaŋdo bo agep. Aregât nenne nâŋgaŋbaenne sumbe are mendenne dosa nenne bo agep. Anutuŋe hain agepgât ikiye agak meme ârândâŋ are miapŋân miawagep. Akto ulikŋân bâleŋe akmâ gayiongât dosa aregât hâuŋe dowâk bo nengiep, a hainâk nâŋgâyion. ²⁶ Anutuŋe hain akmap âmâ ârândâŋ amboŋe manmap dâm nâŋgâyion. Dâ Yesu han-nenŋande nâŋgaŋdenne dosayeŋe bo tatyenŋiâp dâwiapgât keiŋe hinneâk tek tegiâkgât hain are agep.

²⁷ Aregât nen nenjaet akmâ nâŋgâenne humo akbiapgât dop yendâp mon? Bo. Hâk nâŋgâ nâŋgânenne are nâŋgâenne bâliâp. Are amâ den kârikne lokoyiongât bo miawaktâp, amâ Yesu

nânğanjenne hâknenne akto nânġâ nânġânenne yânne aktâp. ²⁸ Aregât den hin nânġâenne yembiâp. Den kârikne lokoenne dosayenne bo dâwiapgât dop bo tatâp. Yesu nânğanmâ kepilâenne âmâ dosanenne bo dâwiâp. ²⁹ Dâ Anutu Yuda luâk nengâlâgâk damun mon? Bo. Yâk âmâ Yuda gâtne bo yâk yengât damun gai. ³⁰ Anutunenne konok yâkne nen Yudagât tirip mem manmaen me tirip bâlâk manmai nen hârokne Yesu nânğanjenne dosayenne bo dâm menenekmap. ³¹ Aregât Yesu nânğanmâ âmâ den kârikne nânġâenne giep mon? Bo dondâne. Nenne Yesu nânğanmâ âmâ den kârikne tângomaen.

4

Anutuġe Abrahamgât luâk âlepne dâep.

¹ Akto Yuda nengât hakunenne Abraham âmâ wan penianep? dâwaen. ² Abrahamne Anutugât den kârikne lokombo Anutuġe ekmâ dosage bo tatġiġdâp dâep dâine benne Abrahamne ikinjaet nânġâmbo humo akbop. Âmâ Anutugât metenân âmâ bo. ³ Akto Anutugât denân hin yendâp aregâten, “Abrahamne Anutu nânğanġo aregât dosage bo dâm makmâ miawaganep.”

⁴ Dâ luâk siâne âi mendo âmâ benne hâuġe waġmaen are âmâ han kalem nenjaet pat bo. Âmâ hâu kutigit aġmaen. ⁵ Dâ luâk siâne âi bo mem âmâ Anutuġe bâlene meme nengât dosa hepunmap yâk nânğanbiap âmâ ainâk Anutuġe luâk aregât nânġâm kepilâ kepilâġaet akmâ nânġâm âmâ dosa bo tatġiġdâp dâm maganbiap. ⁶ Aregât keiġe Dawidiġe hainâgâk nânġâm âmâ luâk siâ âmâ âi bo mendo

Anutuņe gâunaņmâ dosage bo dâwiapgât yâkgât herone maronegât keiņe hin kulengoep.

⁷ “Dosa umatņe mem manmai yâk Anutuņe dosayeņe bo tatyenġiâp dâwiapgât are nânġâmbiâ ukenņe akbiap. ⁸ Akto luâk siâņe bâlêņe akmâ gaep yâk Humoņe nânġaņdo dosage olop bo aktât dâm maganġbiap yâk nânġâmbo amâ ukenņe humo akbiap.”

⁹ Akto ukenņe humo are âmâ Yuda tirip olop nengâlâk pat aktâp mon? Me tirip bâlâk yâk yengât olop aktâp? Aregât Abrahamġât pat nânġaenņe keiņe miawakberâp. Hin. Abrahamņe Anutu nânġaņdo Anutuņe ekto ârândâņ agep. Hain nânġâmaen. ¹⁰ Akto wan sowân dosage bo dâm maganġep? Tirip olop malewân me tirip bâlâk malewân? Tirip olop malewân ain bo maganġep. Uliķnân Abraham tirip bâlâk mandoân Anutuņe dosaje hepunaņep. ¹¹ Yâk tirip bâlâk malewân Anutu nânġaņdo dosaje hepunaņep areġât tirip kulem beirâ waņep. Anutuņe hain aganġepġât benņe Abrahamņe hinņe tirip bâlâk manmaiņe Anutu nânġaņmaigât dosa bâlâk hinare akmai yâk yengât Eweyeņe uliķnân meme agep. ¹² Abraham hain agepġât âmâ nen tirip olop manmaen nengât Ewenenņe agep. Dâ tirip hâknennân miawagep areġât bo. Abrahamņe hâķnân tirip bo talewân âmâ Anutu nânġaņminep, dâp areâk watmâ Anutu nânġaņmaen âmâ benņe Anutu amâ Humonenņe dâenņe ârândâņ akbiap.

¹³ Anutuņe Abrahamġât bâġilupņe hân hârok yeņġiwian dâm hânġât pat katyenġiep amâ den kârikņe loko lokogât akmâ bo. Abrahamņe Anutu

nângaŋmâ kepilâmbô âmâ Anutuŋe nângâmbo ârândân agepgât Anutuŋe hângât magep. ¹⁴ Amâ hingât. Anutuŋe makmâ hâriep aregât pat amâ den kârikŋe lokomai yâk yengât makmâ hâriep dâine benne Anutu nângaŋmaen are amâ yânŋe akbop. Akto Anutuŋe makmâ hâriep akai yânŋe akbop. ¹⁵ Aregât keiŋe hin. Den kârikŋe arekŋe amâ dosagât hâuŋe kaknenŋân katmap. Dâ den kârikŋe bâlâgân âmâ den koko are bo miawakmap. ¹⁶ Are gârâmâ Anutu nângaŋmâ kepilâmaen are nengât miawagep. Amâ wangât? Hingât. Anutuŋe ukennaet akmâ han kalem akmâ makmâ hârembo Abrahamgât kâmolân hârok yâk yengâlân miawagep. Dâ den kârikŋe lokomai gâlâk bo. Abraham amâ nengât hakunenŋe dâmaengât Abrahamŋe Anutu nângaŋdo bunŋe agep amâ nen Anutu nângaŋdenŋe bunŋe akmap aregât akmâ nengâlân miawagep. ¹⁷ Aregât keiŋe Anutuŋe makto kulengoep hin tatâp. “Nâŋe luâk kâmotŋe kâmotŋe yâk yengât Eweyeŋe akbiat dâm makmâ hâregiŋdân.” dâep. Abrahamŋe Anutu nângaŋmâ hin nângâm kârigiep, “Anutu amâ momoŋe mem golâ katyekmap. Akto siâ me siâ bo yendâp are dâmbô miawakmai.” hain nângâep.

Abrahamŋe Anutu nângâm kepilâ anep.

¹⁸ Akto Anutuŋe, “Gângât kâlelupge biwirâ miawakbai” dâm maganep, den are nângâmbo humo agep. Akto den are biwiŋân mem kârikŋe mângim malepgât hânŋe hânŋe yâkgât bâgilupŋe miawakbaigât nângâep. ¹⁹ Hain akmâ âmâ hombaŋŋe 100 malepgât ikiŋe hâkŋe serokŋe akto Saragât hâkŋe gai hainâgâk agep are ekmâ nângâmbo umatŋe bo

agep. Akto Anutuŋe magep are nâŋgâm âmâ bo hanoko agep. ²⁰ Akto Anutuŋe pat âlepgât magep are nâŋgâm âmâ han biwiŋe bo hogo agep. Amâ bunŋerâm malep. Hain akmâ nâŋgaŋmâ kârigem Anutugât nâŋgâmbo âgâ aŋdo ikiye biwi kat katgât kârikŋe akmâ âgâep. ²¹ Amâ Anutuŋe siâ me siâ makmâ hâriep are bunŋe agâk dâmbo âlepŋe miawakbiap nâŋgâep. ²² Hain nâŋgâepgât akto Anutu nâŋgaŋdo bunŋe agepgât Anutuŋe yâkgât nâŋgâm âmâ “Dosage bo tatgiŋdâp.” dâm makto miawagaŋep. ²³ Akto Anutuŋe dosage bo tatgiŋdâp den are Abraham gâlâk bo magep. ²⁴ Nengât gai aktâp. Kembunenŋe Yesu Kristo momoŋân ba mem agalep Anutu yâk nâŋgaŋmaen nengât gai magep. Akto nengât akmâ miawaknengiwiap. ²⁵ Are âmâ Anutuŋe makto Yesu dosa nenŋaet akmâ moep. Mondo dosa bâlâk manbaengât âmâ Anutuŋe momoŋânba mem agalep.

5

Anutuŋe nengât dosanenŋe bo agep aregât biwinenŋe mem sândugemap.

¹ Aregât nen Yesu nâŋgaŋjiongât Anutuŋe nenekto dosa nenŋe bo agep. Aregât Anutuŋe Humonenŋe Yesu Kristogât akmâ nâŋgâmbo kuk bo akto biwinenŋe sândugemap. ² Yesuŋeak hâŋgi menengiepgât Anutuŋe han kalem akmâ damunnenŋe akto yeukŋân manmaen, akmâ maleine Anutugât kulem pagaleŋe miawaknengimbo ekmâ egâlianŋbaen. ³ Akto areâk bo. Umatŋe miawaknengimbo arekŋe amâ han biwinenŋe kârikŋe ketugunengimap

aregât bo hâkân akmaen. Aregât umatņe miawaknengimboân âmâ heronņe akmaen. ⁴ Akto hâk hilâlâm nânġâm bo hâkân aktenņe âmâ wât kârikņe miawaknengimap. Akto wât kârikņande âmâ himbimgât egâlianġaengât mem miawaknengimap. ⁵ Himbimgât egâlianġât olop manbaen arekņe amâ bo pâpkom anun anmaen. Amâ hingât. Anutuņe ikinņe ukenņaet akmâ Heak owâinņeâk nengimapgât Anutugât han kalem are biwinenņân lugum totokombo gem tatmapġât bo pâpkomaen.

⁶ Akto Yesu bo nânġanġion sop ain tân agu agugât dâp bo tatnengiep, sop ain Kristonņe bâleņe meme nengât hâu mem moep. ⁷ Aregât hin nânġaen. Luâk siânņe luâk siâ ârândânġâk manmap are tângowerâm mombiap hainare bo tatâp. Dâ luâk âlepņe han kalem akmâ manmap are tângowerâm mombiap hainare konok konok tatmai mon? ⁸ Dâ Anutuņe nen bâleņe malionân ain han kalemņaet akmâ makto Kristonņe bâleņe nenņaet akmâ moep. Mondo ainâk Anutugât han kalemņe amâ miawakto egion.

⁹ Akto ire Kristogât hepņaet akmâ dosa bâlâk agiongât Anutugât kuk sopņe miawakbiawân âlepņe tânnengumbo yâġġât akmâ kuk are bo miawaknengiwiap. ¹⁰ Amâ hingât. Nen Anutu gasa aganņmâ mandenņe nanņe moepġât akmâ han kalem aknengiep amâ âi humo. Are hinņe Anutuņe han kalem aknengiewân amâ manmanņaet akmâ manman kârikņân katnenekbiapgât amâ âi owâinņe. ¹¹ Akto areâk bo. Kembunenņe Yesu Kristonņe Anutu olop

mendunenegepgât aregât yâkgât akmâ Anutu yâk makmâ egâlianj aganjmâ heronje akmaen.

Adamnje bâleje agepgât momogât dâp miawagep.

¹² Aregât hin nângâne. Luâk Adam konokne bâleje agepgât bâleje keije keije hânân miawagep. Hain akto bâlejaet momo miawaknengiep. Akto luâk hârok bâlim meteyiongât momogât patje luâk hârok katip nenguep. ¹³ Akto den kârikne bo miawaktoân bâlejande ulikjân miawakmâ yiep. Dâ den kârikne bo talep amâ yân yem gaep. ¹⁴ Gârâmâ momonje Adamgâlân keije katmâ luâk manmâ gayi yâk damun yengum gam mando âmâ Mose miawagep. Amâ Adamne den koko agepgât hainare bo agi yâk yengâlân miawagep. Akto Adam amâ luâk siâ beirâ miawakbiapgât tirip akmâ malep.

¹⁵ Dâ han kalemne âmâ den kokogât dop bo aktâp. Luâk konokgât den kokonjaet biwirâne mom hilip aguyi. Hain akto Anutugât han kalemne amâ luâk konok Yesu Kristo yâkgât âlepjaet akmâ Adamgât den koko ewangim luâk biwirâ nengâlân miawagep. ¹⁶ Aregât lâuwâne makbe. Luâk konok Adam yâkne bâleje agepgât nen hârok den âiân miawaktenne dosanenne miawakbiap. Dâ bâleje nenne humo aktoân âmâ Anutunje han kalem nengiep arekne nen dosanenne boân manbaengât mem miawaknengiep. Aregât Anutunje han kalem nengiep are akto luâk konokne bâleje akto miawaknengiep are amâ dop yetje konok bo. ¹⁷ Amâ Adam luâk konokne den koepgât momonje damunnenne akmâ gaep. Aregât

Anutuŋe han kalemŋe yem âgâwiapgât akto dosa bâlâk manman are nengiwiap. Aregât amâ nenŋe luâk konok Yesu Kristo yâkgât akmâ manman kârikŋân kembu akmâ manbaen. ¹⁸ Aregât hin. Luâk konokŋe den kom malepgât luâk hârokŋe hememgât pat agion. Aregât luâk konokŋe ârândânŋe mando dosa bâlâk manbaengât pat agion. ¹⁹ Luâk konokgât den kokogât Anutuŋe nenekmâ dosa luâk dâm nengonlep. Hainagâk luâk konokgât den loko lokogât amâ Anutuŋe nenekmâ dosa luâk bo dâm nengonlep.

²⁰ Akto den kârikŋe amâ bâleŋande sambeleâkgât tânâmŋân miawakto ekbaengât. Dâ bâleŋande sambelem miawakmâ âgâambo ainâk Anutugât han kalem arekŋe sambelem ewangim âgâep. ²¹ Dâ aregât luâk âmbâle agak meme bâleŋe akmâ manbiâ momo dondâ arekŋe meyekto gayi. Gârâmâ luâk âmbâle bikŋande Yesu Kristo Humonenŋe yâkgât akmâ nânŋaŋmâ manmaen nen Anutugât han kalemŋe damunnenŋe akmâ dosa bâlâk menenekmâ manman kârikŋân katnenekbiap. Are âmâ Kristo Kembunnenŋe yâkgât akmâ miawakbiap.

6

Yesugâlân dewatiyion.

¹ Aregât gain dâweren? Anutugât han kalemŋe miawakmâ sambelem ariwiapgât bâleŋe aktenŋe ârândânŋe akbiap. Hain dâweren mon? ² Hain bo. Bâleŋaet akmâ moyion nenŋe gain gain gaetŋe bâleŋe lâuwâŋe akmâ manmaen? ³ Aregât ye hin bo nânŋai mon? Nen tu pulinengiyiân âmâ Yesu

Kristogâlân dewatiyion. Dewatim âmâ yâkgât momoân dewatiyion. ⁴ Hain akmâ dewatieneje âmâ Kristo olop han nenguep. Hain akto Eweje Anutu yâkgât pagalenjande Kristo mem agato momoñânba agalep hain agâk nen golâ akmâ manman irakñe ain manbaen.

⁵ Aregât lâuwânje makbe. Anutuñe nanñe moep aregât pat nengiep. Hain nengim âmâ Yâkgâlân dewatinenegep. Aregât akmâ Yesuñe momoñânba agalep dop hainâk mem agatnenekbiap. ⁶ Aregât hin nângâmaen. Han tâmbânje nenñe Yesu olop lâwinân moep dop hainâk bâlenenenñe bo agâkgât miawagep. Hain miawakto bâlenje nenñande bo damunnenñe akbiapgât dâp miawagep. ⁷ Amâ hingât luâk siâ mondo âmâ bâlenjande lâuwânje bo damunñe akbiap.

⁸ Akto nen âmâ Kristo olop moyion aregât yâk momoñânba agatmâ manmâ âgâwiapgât nen âkâ yâk olop manmâ âgâwaen. Hain nângâmaen. ⁹ Akto Kristogât hin nângâmaen. Yâk momoñân ba agalepgât lâuwânje bo mombiap. Akto momogât pat arekñe lâuwânje bo damunñe akbiap. Bo. ¹⁰ Yâk moep amâ bâlenjaet sop konok mondo bo agep are. Akto hinñe mandâp amâ Anutugât akmâ mandâp. ¹¹ Aregât ye hainâgâk bâlenjeñejaet pat moyigât Yesu Kristo yâk olop Anutugât akmâ manmâ âgâniâm dâwei. ¹² Aregât bâlenjande hâkyenje damunñe akbopgât nângâmâk manbei. Akto hâkyenjande egâlian bâlenjaet hâwâtyekbopgât are gai nângâmâk biwiyenje damunñe akmâ manbei. ¹³ Hain akmâ hâkyenjande bâlenjaet pat hoñ bawa bo aganbiapgât hin akbei. Anutuñe momoñânba

olon yekmâ manman âlepñân katyegepgât hâk biwiyenje Anutugât kotgâm wanbiâ âlepñaet hon manbiâp. ¹⁴ Amâ hingât. Ye den kârikñande bo damunyenje akmâ denân katyekmap. Bo. Anutugât han kalemñande damunyenje akmapgât bâlenjande luâk kembu bo akyenjiwiâp.

Agak meme âlepñe aregât hon bawa agañmaen.

¹⁵ Aregât ire gain akbaen? Anutugât han kalemân manmâ arienje den kârikñaet horat hulaj agepgât bâlene mendenne ârândâñ akbiap mon? Amâ bo. ¹⁶ Luâk kembu siâ han biwiyenjande hikom kinmâ lau lokoanbainje yâkgât hon agañmâ âi meanbai. Bâlenjande damunyenje akto aregât hon manañmâ ageine mom hilip aguwâi me lau loko lokoje damunyenje akto yâkgât hon manmâ âgâmbiâ Anutuñe yekto huraguwiâp. Are nângâi mon? ¹⁷ Ye bâlenjaet hon manmâ gayi are bo agep. Dâ luâk bikñande Yesugât keñe makyenjimbiâ âmâ pânñan mem han yenjande nângâm kepilâm lokomai aregât Anutu mepainje meanbaen. ¹⁸ Dosa yenjande wârakmâ mem ge katyekto aregât hon bawa akmâ mali are Anutuñe kom mem olonjekmâ agak meme âlepñân katyekto aregât hon bawa agañi.

¹⁹ Han tâmbâñe yenje yeukñe aregât luâgân siâ me siâ yendâp aregât dop katmâ makyenjiân. Ye ulikñân hâk biwiyenje egâlian bâlene aregât hon agañbiâ humo akto gulip mali. Aregât sop unjak âmâ hâk biwiyenje ârândâñgât hon bawa agañbiâ humo akto han ârândâñgâk akmâ manbei. ²⁰ Ulikñân bâlenjaet hon maliân ain ârândâñ manmangât horat are bo yeyenjiep. ²¹ Akto sop ain wan bunje miawakyenjiep? Bo. Aregât kakñân

momo miawak yenngiwiapgât pat. Dâ hinne are nângâm âmâ aņunne olowâk mandâi. ²² Bâin. Sop hinne amâ bâleņæet tâk hulaņdo Anutugât hoņ manman agi mandâi. Hain akbiâ han irakņe akto agak meme ârândâņ miawak yenngiep. Dâ beirâ âmâ manman kârikņe mem manbai. ²³ Bâleņæet hâuņe âmâ momo membaen. Dâ Anutuņe han kalemņæet akmâ Kembu nenne Yesu Kristo yâkgât akmâ manman kârikņe nengimbo mem manmaen.

7

Yesu moepgât den kârikņæet tâk hâreaņep.

¹ Galama, den kârikņæet keiņe nângâmai ye hin makyenngiwe. Ye hin bo nângâmai mon? Nen mandenne den kârikņe arekņe damun nenne akmap. Dâ mombaenân âmâ den kârikņe arekņe bo damun nenne akbiap. ² Aregât âmbâle siâņe luâk siâ mendoân den kârikņe hin kalaņep, luâk hepunbiapgât dop bo yendâp. Dâ luâkņe mondo den kârikņe makmâ hâreaņep are hepunbiapgât dâp talaņbiap. ³ Aregât luâkņe golâ mandoân ain âmâ hepunmâ luâk siâ mendo âmâ âmbâle bâleņe dâm konmaen. Dâ luâkņe mondo âmâ luâkdâ âmbendâ menduyelegep tâk are hâreaņep. Aregât luâk siâ membiawân ain mem hepun hepongât dosa bo membiap.

⁴ Galama yengât keiyeņe hainâk yendâp. Kristogât hâkņe mondo ain den kârikņe aregât tâk hâriep. Hârembo den kârikņæet moyi. Are amâ ambo siâgât agi. Anutuņe nanne momoņânba agalep mandâp yâkgât kâmot agi. Aregât nen

Anutu bunje peniañiongât. ⁵ Dâ ulikñân manman tâmbâñe malion sop ain den kârikñe arekñe egâlian bâleñe kâlâpñe waito hâk biwinennân âiñe mem malep. Hain aknengimbo momogât bunje mem peniañion. ⁶ Dâ hinje amâ den kârikñe arekñe bo damun nenñe akmap aregât tâkñe hulaj nengiewân amâ den kulemgât dâp tâmbâñe bo watmâ amâ Heakgât dâp irakñe tâlim arimaen.

Bâleñande hilip nengumap.

⁷ Aregât gain dâweren? Den kârikñe ire amâ bâleñe mon? Hain bo. Den kârikñe bo tatâp dâine nâ bâleñet keiñe bo nâñgâm kotgâwom. Den kârikñe arekñe hin makmâ miawakniñdâp, “Egâlian bâleñe bo nâñgâm egâlianben.” den are bo tatâp dâine egâlian bâleñe bo nâñgâwom. ⁸ Gârâmâ bâleñe are amâ den kârikñe arekñe tân agañdo hanne hâwâto egâlian bâleñe keiñe keiñe miawakniñep. Amâ den kârikñe arekñe bo yendâp dâine bâleñande yân limbâp agum yembop. ⁹ Nâ ulikñân den kârikñet dâwân bo malân ain amâ manmanne miawaknengiep. Aregât hamiñân den kârikñe arekñe penâniñdo bâleñande biwinân âi mendo momogât dâwân ariân. ¹⁰ Den kârikñe arekñe manmangât dâp makmâ miawakmap arekñe purik dâm momogât dâp miawakniñep. ¹¹ Amâ hingât. Bâleñe are amâ den kârikñe arekñe tângombo kârikñe akmâ heniñmâ nugumbo momo hinare agân. ¹² Aregât hin nâñgân. Den kârikñe amâ dosa bâlâk. Akto Anutuñe wan me wan makmâ hâriep den are hainâk amâ dosa bâlâk akto Anutuñe nâñgâmbo âlepñe akto ârândâñ akmap. ¹³ Aregât hin dâwe

mon? Den kârikņe amâ âlepņe arekņe konok nâ nugumbo momogât dâp miawakņiņep mon? Hain bo. Bâleņenande den kârikņe âlepņe aregât akmâ momoņe nuguep. Amâ hingât. Anutuņe wan makmâ hâriep den aregât akmâ bâleņenaet keiņe nâņgâm heņgemgore bâleņaet hândâkņe dondâ bâleņe miawakmâ kinbiapgât.

Bâleņande hikom katnenekmap.

¹⁴ Dâ nenâmâ hin nâņgâmaen. Den kârikņe amâ Heakgât pat. Dâ nâmâ bâleņaet hoņ agañmâ hângât pat manman. ¹⁵ Nâ agak memene nâņgâwerâm aktere purik gurik agep. Amâ hin. Nâ siâ me siâ akberâre umatņe akto bo akman. Dâ siâ me siâ sârekoman are amâ akman. ¹⁶ Akto wan me wan sârikoman are akman âmâ benņe hin nâņgân, den kârikņe are nâņgâre âlepņe akmap dâman. ¹⁷ Aregât wan akmâ bâliman are amâ nâ nune hangât bo akman. Bâleņande hanân yem hâwâtneko akman aregât. ¹⁸ Nâ keine hin nâņgân. Agak meme âlepņaet egâliañman are amâ membiangât dâp bo tatniņdâp, aregât hâknân wan me wan siâ âlepņe bo yendâp. Hain nâņgân. ¹⁹ Amâ hin. Nâ wan me wan siâ âlepņe akbian dâm kinmâ âmâ bo akman. Dâ siâ me siâ bâleņe bo akbian dâm kinmâ âmâ akman. ²⁰ Bâleņe bo akbian dâm makmâ hanâk akman amâ nunak bo. Bâleņe biwinân tatmap arekņe huņgunniņdo hanâk akman, hain nâņgân. ²¹ Aregât nâņgâlân hin miawakmap. Siâ me siâ âlepņe akberâre âmâ bâleņande mete katniņmap. ²² Nâ han biwinande Anutuņe den kârikņe kalep are nâņgâre ârândâņ akto heroņe akman. ²³ Dâ hâknande âmâ nâņgâ nâņgâne are kondo

gembo bâleje hâknân manmap arekne hiko neкто umatnân mandân. ²⁴ Aregât mesak gosak akman. Gâuk niñande hâkne momogât pat agakne mem kotdâ nekbiap? Amâ hin. ²⁵ Nâmâ Yesu Kristo Humo nenñe yâkgât akmâ Anutu mepaiñe meman. Bâin. Nâ Anutugât den kârikne are nângâre ârândân akto nângâ nângânande hoñ agañman. Dâ hâknande âmâ bâleñaet kârikne hoñ agañman.

8

Yesuñe dosanenñe puliepgât yâk nângâm kepilâ añaen.

¹ Aregât Yesu Kristo olop manmaen nen âmâ Anutuñe bâleñaet hâuñe bo makmâ kotdâ nengiwip. ² Amâ hingât Anutugât Heak arekne Yesu Kristogât manman are nengiep pat arekne bâleñaet tâk akto momogât tâk hâriep. ³ Akto den kârikne are han tâmbâñe nenñande kârikneñe kondo gembo nengâlân âi mem âsinenekto bo agep. Aregât Anutuñe nanñe luâk hainare ak dâambo luâk akmâ gem mando bâleñaet akmâ nanñe kuk agaño moep. ⁴ Mondo âmâ den kârikne loko loko âlepñe miawaknengiep. Nen han tâmbâñaet dâp bo watmaen. Bo. Amâ Heakgât dâp tâlimaen nengâlân den kârikne loko loko âlepñe mendenñe huraguwiapgât dâp miawaknengiep. ⁵ Hâkyeñaet dâp tâlimai yâkne âmâ hâkgât nângâmbiâ humo akmap. Dâ Heakgât dâp tâlimaen nenñe âmâ Heakgât siâ me siâ aregâlâk nângâenñe humo akmap. ⁶ Hâkgâlâk nângâm manbiâ âmâ momo miawakyeñgimbo hilip aguwai. Dâ Heakgât nângâenñe humo akbiap âmâ manman âlepñe

akto biwi sânduk membaen. ⁷ Amâ hingât. Luâk siâŋe hângâlâk nâŋgâmbô humo akmap yâkgât nâŋgâ nâŋgâŋande Anutu gasa agaŋmap. Nâŋgâ nâŋgâŋande Anutugât den kârikŋaet amukŋân tatbiapgât dop bo tatâpgât den kârikŋe are hâkâŋe akmâ panmap. ⁸ Amâ wangât? Hingât. Hâkgâlâk nâŋgâmai yâk Anutuŋe yekmâ hâkâŋ akmap.

⁹ Dâ ye Romagâtŋe amâ Anutugât Heakŋe arekŋe hanyenân tatmâ manmapgât hâkgât patŋande bo damun yeŋe akmap. Amâ Heak olop menduguakmâ manmaigât. Dâ siâŋe Kristogât Heak bâlâk manbiapŋe yâkgât pat bo mem manbiap. ¹⁰ Dâ Kristoŋe hanyenân manmawân hâkyenande bâleŋaet akmâ momoŋe akyengimap gârâmâ han otné yeŋande amâ dosa bâlâkgât golâ akmâ manmap. ¹¹ Akto Yesu momoŋânba mem agalep Anutugât Heakŋe hanyenân tatmap arekŋe Kristo Yesu momoŋânba mem agalep dop hainâk hanyenân Heakŋe mandâp yâkgât akmâ hâkyeŋe momoŋe are hainagâk mem golâ katbiap.

Heakŋe menenekto yâkgât agion.

¹² Galalupne, nengât hâu yendâp aregât hâknennæet bo nâŋgâmâk manbaen. Akto hâkgât agak meme bo mem manbaen. ¹³ Amâ ye hâkgât agak meme watmâ manbai âmâ hilip aguwai. Dâ Heagât kârikŋân agak meme are kombiâ gembo âmâ manman âlepŋân manmâ âgâwai. ¹⁴ Aregât keiŋe hin. Anutugât Heak arekŋe sokoyekto manmai yâk âmâ Anutuŋe nan barat dâm yeŋgonmap. ¹⁵ Anutugât Heak yeŋgiep are âmâ hoŋ manmanlupŋe manmâ hamep akŋetgât bo. Nan barat bunŋe manŋetgât Heak yeŋgiep.

Aregât akmâ Ewenenne âlepne dâm konmaen. ¹⁶ Amâ nen Anutugât nan barat manden den are âmâ Heakne biwinennân makmâ humolembo nângâmaen. ¹⁷ Nanne baratne mandengât Anutuñe bânne bânne nengiwiapgât dop miawaknengiep gât Kristo olop mendugum damun akbaen. Amâ in hânân yâk olop dâtne metne kakñân manbaen âmâ âlepne yâk olop egâlian pagaleñe âlepñân nen hârogâk manbaen.

Manman âlepne aregât lâmgom manmaen.

¹⁸ Galalupne. Nâ hin nângân. Himbimân Anutuñe egâlian âlepne nengiwiap arekne hânân hâk hilâlâm umburuk yendâp are ewangiâp aregât hâk hilâlâm gât nângâenne yânne akbiâp. ¹⁹ Anutugât nan barat manmaen nen pagaleñe miawaknengimbo tekteknân manbaengât siâ me siâ liulep arekne aregât imbianmâ lâmgom manmai. ²⁰ Amâ hingât. Anutuñe siâ me siâ liulep are mom bâle bâlegât kâlegen katyegep. Are amâ yengât hangât bo. Anutuñe siân wan âlepne miawakbiap aregât lâmgom manbaigât lope kâlegen katyegep. ²¹ Amâ hingât. Beirâ wan me wan liulep are gai mom hilipaguwaigât tâkne gunmâ panmâ kârikne akmâ Anutugât nanne baratne nengâlân egâlian âlepñân dewatinenekbai. Haingât.

²² Nen aregât hin nângâmaen. Anutuñe kotne siâ siâ hârok ketuguep are hârokne âmbâleñe nanan memberâm hâk hilâlâm nângâm kamboñmai dop hainâk akmâ lâmgom manmâ kamboñmai. ²³ Akto wan me wan liulep areâk bo akmap. Nenâkai, Heakne biwinenne bunne aknengimap

Anutugât nan barat manden aregât keiņe miawaknengiâkgât akto Anutuņe hâk nenņe mem hulanmâ hengemgom mem tek tekņân katnenekbiapgât sopņe lâmgom manmâ han nenņande mesak gosak akmâ umburukņe akmaen. ²⁴ Hain akmâ lâmgom manmaengât amâ Anutuņe hengem nenguwiapgât pat miawak nengiep. Dâ siâņe siâ lâmgom manbiapņe âmâ wan me wan ekbiawân lâuwâņe bo lâmgom âmâ biwi owâi bo akmap. ²⁵ Gârâmâ nenâmâ hinņe wan bo ekmaen are lâmgomaen âmâ biwinenņe owâiņe akto bo hâkâņ akmaen.

Heakņe tânnengumap.

²⁶ Akto dop hainâk Heakņe gai nen yeukņæet akmâ tân nengumap. Nen hin me hain ulilanņdenņe ârândâņ akbiap are âmâ bonâņgâm kotgâmaengât Heakņe han nenņe mem owâimbo den luâkņe bo nâņgâmaenņe are maktenņe miawakto Anutuņe nâņgâmap. ²⁷ Akto Anutu biwinenņân ekmapņe âmâ Heakgât den nâņgâmap. Amâ Heakņe nen Anutugât kâmot nengât akmâ Anutuņe wan me wan makmâ hâriep are nâņgâmap areâkgât ulilanņmap. ²⁸ Akto areâk bo. Nen hin nâņgâmaen. Anutu han nenņande nâņgaņmaen nengât akmâ wan me wan miawaknengimap are hârok mem tân nenguwiapgât mâņginenekmap. Amâ yâkņe han kalemņæet akmâ oloņ nenegep nengât. ²⁹ Ulikņân Anutuņe han kalemņæet akmâ potatnenegep gât Nanņæet tirip akbaengât makmâ hâriep. Akto emiņe gariņe biwirâ aktenņe ikiņe âmâ teunenņe humo ulikņân gâtņe akmâ manbiapgât makmâ hâriep. ³⁰ Anutu

luâk âmbâle uliknân nângâm hengemgom potat nenegepgât nengonmâ oloņnenegep. Nengonmâ oloņ nenegepgât dosa nenņe bo aktâp dâep. Dosa nenņe bo aktâp dâep gât egâlian âlepņe nengiep.

Anutugât han kalemânba siâ me siâņe bo hilip-nenguwiap.

³¹ Den are keiņe gain gain yendâp dâweren? Anutuņe gala bo aknengimap dâine gasalupnenņande dondâ yeukņe aknengimbiâ hilip aguwâen. ³² Anutuņe ikiņe Nanņe bo gangerâm dumnennân kilâkgât hunğun anđo giep are amâ âi humo. Dâ wan me wan yâkgât akmâ nengiwiap amâ owâiņe. ³³ Anutuņe ikiņak dosa nenņe bo aktâp dâmap aregât yâkgât kâmotlupņe nen niņande denân katnenekbop? ³⁴ Akto Kristo Yesu ikiņak moep. Akmâ moewâk bo. Yâk momoņânba agatmâ Anutugât bânņe bungen âgâ talepgât nengât akmâ Anutu ulilaņmap, aregât niņande denân katnenekto dosa nenņe miawakbiap? ³⁵ Akto Kristogât han kalemânba wan arekņaetņe oloņ nenekto yân manbaen? Amâ hâk hilâlâmņe me dâtņe metņande me gasalupnenņande me mop manmanņe me hanokoak manmanņe me tembe bugâņe arekņe? Are hârokņe Kristogât han kalemânba oloņnenekbiapgât dop bo. ³⁶ Amâ Anutuņe aregât magep hin tatâp,

“Anutu gângât akmâ hâk hilâlâm nângâenņe hokboâk hokboâk gasalupnenņande itin gulam menenekmai. Akto bau kom gâimaen aregât dop hainâk aknengimai.”

³⁷ Hain arekñe bo mem ge katnenekbiap. Bo. Yesuñe han kalem akmapgât kârigem kârikñe humo penianmâ kinmaen. ³⁸ Aregât hin nângâm kârigeân. Momoñe me manmanñe me añeloñe me luâk kembuñe me hinñe miawakmapñe me beirâ miawakbiapñe me siâ me siâ kârikñe arekñe ³⁹ me siâ siâ âgâñe me siâ siâ gegenñe me wan me wan Anutuñe liulep arekñe Anutugât han kalemñande Yesu Kristoñe katip nengumap ain ba bo oloñnenekbiap.

9

Pauloñe Yuda luâk yenğât yai nângâep.

¹ Nâ Kristogât akmâ den bunne maktere nângâñet. Heakñe hanne mem pagalembo nângâm hengemgom makyenğiwe. ² Nâñe nângât ginbailupne Yuda gâtñe yâkgât akmâ nângâyenğire biwine umatñe dondâ akmap. ³ Aregât hin nângân mon? Anutuñe Yuda luâk galalupne yâkgât akmâ hepun nekmâ âmâ meyekbiap are nângâm owâiân. ⁴ Yuda luâk nengât kotnenñe siâ Israegât kâmotlupñe are Anutuñe nângât mândulupnerâm ikinâet pagaleñe hekatyenğiep. Hain akmâ âmâ Anutu olop dewatiwaigât pat akto den kârikñe makmâ miawak yenğiep. Akto sumbegât emetñe aregât hin akñetgât dâpñe keñe hekatyenğiep. Akto siân wan me wan hârok yenğiwian dâm makmâ hâre yenğiep. ⁵ Dâ Yuda nengât hakulupnenñe amâ luâk kautñe mali. Akto Anutuñe nanñe huñganañdo giep are amâ nengât hutnenñânba miawagep. Yâk âmâ wan me wan hârok nengât kautñe malep, yâk

âmâ Anutu aregât nenje nânğan denje humone humo kârikje talañbiap. A bundâk. ⁶ Dâ ya makyengiân aregât hin bo dâwaen, “Yuda luâkne wan akmai aregât Anutugât den yeukne agep.” bo dâwaen. Israe gâlân ba miawagion âmâ Israe luâk bunje hârokne ârândân bo agi. ⁷ Dâ Abrahamgât uliklupne miawagi are âmâ kâmotlupne bunje gai bo agi. Gârâmâ aregât Anutune makto Moseje hin kulengoep, “Abraham gânġât nanje Isakagât kâlegenlupne amâ gânġât pat akbai.” ⁸ Den aregât keije hin tatâp. Abrahamgât kâlegen gâtje hârok âmâ Anutune mândulupnerâm bo yeñgonmap. Anutune makmâ hâriewân miawagi yâkneak Abrahamgât kâlelupne bunje agion. ⁹ Aregât Anutugât denje hin talep a bunje agep, “Homban kakñân sop miawakto Sara nanañ mem mandoân purikatbian.”

¹⁰ Akto areâk bo. Rebeka âmâ luâkne hakunenje Isaka yâk olop manmâ nanañ lâuwâ megolak tepje agep. ¹¹ Tepje akto nanañ lâuwâ bo miawakmâ maliat ain bâleje me âlepje bo agialân Anutune yâk yetgât hin magep, “Teuñande emiñæet hoñ manbiâp.” ¹² Amâ Anutu ikinje hanñæet den are kârikne agâk gât nânġâm nanañ manman yetñæet bo makmâ kârigiep. Ikinæet hanñæet mem potat yelekmâ kinmâ hain magep. ¹³ Aregât Anutugât den bikje hin tatâp, “Nânje Yakobo âmâ han kalem agañmâ okot âlep nânġân. Dâ Esau âmâ hâkân agañdân.”

¹⁴ Akto aregât gain dâweren? Anutune wan me wan mendo bo ârândân akmap? A borondânje.

¹⁵ Ulikñân Anutune Mose hin magañep,

“Luâk me âmbâle siâ are okot âlep agaņdere ârândân akmap. Akto luâk me âmbâle siâ han kalem agaņdere ârândân akmap.” dâep.

¹⁶ Aregât keiņe hin. Anutuņe luâk hanyeņaet me âiyeņaet bo nâņgâyeņgimap. Anutu ikiņe han kalemņaelâk nâņgâm makmâ potat nenekmap.

¹⁷ Aregât keiņe Anutugât denņande Parao hin magaņep, “Nâ gâņgâlân kârikņene mem miap pandere hân ârândân ariâkgât dâm kat gegân.” ¹⁸ Aregât Anutuņe âmâ luâk siâ han kalem agaņberâm âmâ âlepņe agaņbiap. Dâ luâk siâ han biwiņe gisapkoaņberâm âmâ âlepņe gisapkoaņbiap. Amâ ârândân akmap.

Yuda luâkņe Anutu hamiaņi.

¹⁹ Are oyaņmâ yeņgâlân gâtņe siâņe hin makniņbiap mon? “Anutuņe wan me wan akberâm dâmbo luâkņe bo miawagâk gât horat kalaņbiapgât dop bo tatâp aregât Anutuņe luâk nengât nâņgâmbo bâlimap are bo ârândân aktâp.” dâm makniņbiap mon? ²⁰ Wei gâmâ luâgâk. Wangât Anutu den hâuņe magaņbiat? Aregât den dopņe hin makbe. Wangât umbâņe luâk umbâ mângimap are hin magaņbop, “Gâ wangât tiripne hain are mânginegen?” ²¹ Aregât umbâ mângimap luâk arekņe hân numņe mem umbâ bikņe luâk yâk yeņgât pat mângiwop. Dâ bikņe dua bau yâk yeņgât mângimbo ârândân akbiap. ²² Amâ Anutuņe kuk akto kârikņeņe tekteknân kato ekbaigât umbâ bikņe hogom panyekbiapgât nâņgâyeņgim bo hâkâņ akyeņgiep. ²³ Hain akyeņgim umbâ bikņe han kalamņaet pat maleine beirâ egâliāņ pagalenân kâmot katnenegâk gât nâņgâmbo

yendâp. Umbâ are nengâlân egâlian unsambe nengiepgât menenekmâ manmap. ²⁴ Dâ aregât amâ Yuda luâk âmbâleâk bo. Hân siâ siâ Yuda luâk bo manmai aregât nen han kalemñaet pat aknegât oloņ nenegep. ²⁵ Akto Anutuņe propete Hosea hin magaņdo kulemgoep,

“Luâk kâmot ambo bo akyenġiân yâk nâņgât luâk âmbâlelupne yeņgonmâ makyenġiwian. Akto âmbâle okot han kalemņe bâlâk malep yâk nâņgât dâtâne dâm konbian.”

²⁶ Akto den siâ hin,

“Nâņe ye nâņgât luâk âmbâlelupne bo dâm makyenġiân ain kotyeņe Anutu manman amboņaet nanne baratne yeņgonbian.” dâep.

²⁷⁻²⁸ Dâ areâk bo. Yesaianę Israegât hin magep, Kembuņe hânân denņaet bunęe dowâgâk mem miap pando kârigešiap aregât Anutuņe hin dâep, “Israegât kâlelupņe haruân nupi yendâp aregât dop miawakmâ manbai nâņe hutņânba konok konok mem oloņyektere manman âlepņân manbai.” dâep.

²⁹ Akto Yesaianę beirâ miawakbiapgât hin magep,

“Humonenęe kâmot kârikņe Humo Amboyeņande hutnenņânba konok konok bo oloņ nenekto dâine âmâ Sodom Gomora itin gulam agiat hain are akbâen.”

Yuda luâkņe âlepņe aknegât ewum hâumgoyi.

³⁰ Aregât ire gain dâweren? Hin mon? Luâk Anutugât kotņe bonâņgâmainęe âlepņe akņetgât bo nâņgâmâk watmâ manmai yâk âlepņe manmaigât memai. Are amâ Kristo nâņgaņmaigât memai.

³¹ Dâ Israe luâk den kârikņe lokom kinbiâ Anutuņe yekto huraguâkgât kârikņe agi. Kârikņe akmâ den kârikņe bo lokom âlepņe bo akmâ âmâ umale agi. ³² Amâ wangât? Hingât. Yuda luâk âmbâle arekņe Kristo nâņgâ aņbaigât pat bo wali. Yân agak memeyeņe aregât âlepņe aknegât hain agi. Are amâ dâwân kât yiep ain keiyeņe kondo kâwâwâņ kârâyi. ³³ Aregât Anutuņe hin makto Yesaianę kulengoep,

“Nâņgâi. Nâ Sion gimbâņân kât siâ katere tatbiap. Arekņe keiyeņe erâmbo peņ panyekbiap. Akto kât humo katberân ain kom hewewen panbai. Dâ siâņe nâņganņbiap âmâ bo pâpkom aņun aņgiwiap.”

10

Yuda luâkņe Anutugât den hâkâņe dâyi.

¹ Galama, nâņgât kâmot Yuda luâk âmâle are Anutuņe meyekbiapgât hannande dondâ hâwât nekto Anutu aregât ulilaņman. ² Amâ yâkņe Anutugât âi mendenņe huraguâk dâm kârikņe akmâ manmai. Dâ amâ pâpkom kinmâ akmai. ³ Yâkņe Anutugâlân ba dosa bâlâk aknegât dâp yendâp aregât pâpkomai gât yeņeak âlepņe aknegât âiņe kârikņe memai. Hain akmâ Anutuņe yekto huraguâk gât dâp hâkâņ akmai. ⁴ Aregât keiņe hin. Kristoņe den kârikņe are lokombo bo agep. Aregât luâk âmâle siânbaņe Kristo nâņganņbiâ âmâ Anutuņe dosayeņe bo dâm yeņgonmap.

⁵ Aregât Moseņe hin kulengoep, “Luâk siâ den kârikņe are hârok lokore Anutuņe nekto huraguâk gât manbiap yâkņe den kârikņe hârok lokombo

âmâ âlepņe manmanân manbiap.” ⁶ Dâ Kristo nânğanbiâ Anutuņe yekto huragumap gât den hin yendâp, “Niņande himbimân âgâm Kristo mem oloņdo gewiap? ⁷ Me niņande hememân gem Kristo momoņe yâk yengât hutyenânba oloņdo gawiap? Ye hain bo dâwai.” ⁸ Anutuņe magep hin tatâp, “Anutugât denņe kâlewângen bo tatâp. Enemân akto biwigân yendâp.” Are amâ biwi kat katgât den pat âlepņe nânğanetgât makyengimaen. ⁹ Amâ Yesu amâ Kembune dâwiat akto biwigân Anutuņe Yesu momoņânba mem agalep dâm nânğâm kepilâwiat benņe Anutuņe heņgem gugumbo manman âlepņân manbiat. ¹⁰ Aregât han nenņande Yesu nânğanmâ âmâ dosa bâlâk manmaen. Akto launennande makmâ miap panmâ mandenņe Anutuņe heņgem nengumap. ¹¹ Aregât Anutugât denņande hin dâep, “Siâņe nânğanbiap âmâ bo pâpkom anun anġiwiap.” ¹² Amâ Yuda me Girik luâk potat potat bo yendâp. Humo Kembu konokņe amâ hârokgât Kembunenņe mandâp. Yâkņe luâk me âmbâle bikņande yâkgât kotņe konbiâ âmâ ainâk han kalem akyengim wan me wan âlepņe potatmâ yengiwip. ¹³ Aregât Anutugât denņande hin dâep, “Niņe me niņe Kembu kondo âmâ ainâk Anutuņe mem heņgemgo anġbiap.” ¹⁴ Gârâmâ luâk âmbâleņe amâ Kristo bo nânğanmai amâ gain gain kotņe konbai? Akto siâņe Kristogât keiņe bo makyengimbo âmâ gain gain nânğanbai? Akto den pat âlepņe makmaen nengâlân gâtņe konokņe bo arim makyengimbo âmâ gain gain den pat âlepņe nânğâwai? ¹⁵ Akto Anutuņe bo huņgunanġo âmâ

gain gain arim makyenjiwiap? Anutuņe makto siāņe hin kulengoep, “Pat âlep den makmak luâk togombiâ âmâ, munņande han nâņgâ nâņgânenņe mem owâimap.”

Anutuņe Yuda luâk âmbâle yenğondo bo nâņgaņi.

¹⁶ Den pat âlepņe ire amâ luâk hârokņe bo nâņgaņmâ bunņerâm kepilâyi aregât Yesaianje hin magep, “Kembu, den pat âlepņe makmâ miawaktenņe siāņe bo nâņgaņmâ kârigiep.” dâep. ¹⁷ Aregât hin nâņgâweren. Siāņe Kristogât pat makyenğimbo den bunņe nâņgâmaen. Akto den bunņe nâņgâenņe amâ biwi kat katgât miawakmap. ¹⁸ Gârâmâ aregât hin aiyenğuân. Luâk âmbâle amâ den pat âlepņe are bo nâņgâyi mon? Hain bo. Anutuņe makto siāņe hin kulengoep.

Denyenande hânņe hânņe sambelem ârândân agep. Akto den lauyenande hân tunğuânğen ârândân agep.

¹⁹ Aregât gaetņe hin aiyenğuân, Israe luâk bo nâņgâm heņgemgoyi mon? Hain bo. Ulikņân Mosenje hin kulengoep,

“Anutuņe hin dâep, Nâņe luâk yânņe meyektere ye ewangiyekbiâ nâņgâmbiâ bâliwiap. Akto luâk kâmot bo nâņgâ niņbai are olonyektere yekmâ biwiyeņe kâlâp akbiap.” dâm kulengoep.

²⁰ Akto beirâ Yesaianje den umatņe mem gem makmâ âmâ bo aņun aņgim hin dâep,

“Anutuņe hin dâep, Bo kulâgât nekmâ maliņe penâniņi. Nâņgât bo makmâ mali yâk yenğât mete katyenğiân.” dâep.

21 Hain akmâ Yesaianje Israe luâk yâk yeŋgât hin makmâ kulengoep,

“Anutuŋe hin dâep, Nâ luâk kâmot nâŋgâm gulipagakŋe akto den kokoŋe sop kâlep gaŋet dâm yeŋgonmâ mandere bo togoyi dâep.” dâm kulengoep.

11

Anutuŋe Yuda luâk bikŋeâk ikiŋaet pat meyegep.

¹ Aregât nâ hin aiyenŋuân, Anutuŋe Yuda luâk hârok hepunnenegep mon? Bo. Hain bo agep. Amâ nâkai Israe gâtŋe manmâ gan. Akto hakune amâ Abraham. Akto nâmâ Bensamiŋ kâmolân gâtŋe mandân. ² Anutuŋe Israe bo hepun negep amâ hingât. Ulikŋân luâk nâŋgayeŋgim potatyegep amâ bo hepun yekmap. Amâ ye Anutugât denŋe are bo oyaŋmâ nâŋgâmai mon? Eliane Israe luâk yâk yeŋgât akmâ Anutu hin dâm maganep, ³“Kembu, Israe luâkŋe propete yeŋgum âmâ sumbe kat katgât are patakom itiŋ gulam meyi. Dâ nuneâk mandere gai nuguwerâm aktâi.” ⁴ Hain dâambo den hâuŋe gain purikalanep? Hin. “Nâ luâk 7,000 koratyenŋure lâpio kotŋe Baali yâkgât bo kâŋgoaŋi.” ⁵ Anutuŋe hain dâepgât hin nâŋgâne. Anutuŋe han kalem akmâ Yuda luâk bikŋe mem kepilâ yegepgât mandâi. ⁶ Aregât Anutuŋe han kalemŋaet akyenŋiep. Akyenŋiep gât âmâ agak meme yeŋaet bo akyenŋiep. Hain bo akto dâine âmâ han kalemŋe bunŋe bo akbop.

⁷ Akto gain gain nâŋgâweren? Israe luâk yâkŋe Anutuŋe nenekto huraguâkgât kulâgâtâmâ âi humo meyi, are bo mem miawagi. Dâ Anutuŋe mem

kepilâ yegep yâkņe âmâ meyi. Bikņe humo âmâ Anutuņe makto biwiyenęe kârik agi. ⁸ Aregât Anutugât denņân hin tatâp,

“Anutuņe han yeņe mem gâlikoep. Akto dewunyeņe gai mem limbâpkoe. Akto ondopyeņe mem gisapkoep. Gisapkombo gam gam maleine uņak hainâk yu mandâi.

⁹ Akto Dawidiņe hin dâep,

“Anutu, gâņe makmenâ sot nem tatbiân âmâ sot akto kat katyeņande lâmbâlân dowâk peņ panmâ yeņguâk. Akto wan me wan agigât hâņe hân dâņņân gewai hainare miawakyenęiwiapgât makmenâ miawagâk. ¹⁰ Gâ dewunyeņe mem limbâp komenâ dewun bok akbai. Dâ hamiyenęe mem goņgoņgomenâ pâit pâitņe akmâ manmâ âgâwei.” kulemoep.

Anutuņe kâmot siân gâtņe ikiņaet pat meyegep.

¹¹ Akto hin aiyenęuân. Israe luâk yâkņe mokmok mem peņ panmâ mom bo akbaigât hain miawagep mon? Hain bo. Israe luâkņe bâleņe agigât Anutuņe Israe gâtņe bo manmai meyegep. Meyekto âmâ beirâ Israe gâtņande Israe gâtņe bo manmai manman âlepņân manmai are yekbiâ bâliwiapgât. ¹² Akto Israe luâk âmbâle bâleņe agi aregât den pat âlepņe hânņe hânņe ârândâņ arim metiep. Akto Israe luâk âmbâle yeukņe akbiâ Anutugât pat bo miawakyenęiep gât Yuda luâk bo manmai yâk yeņgâlân den bunņe peniyenęiep. Yei, maleine Anutuņe Yuda luâk hârok meyekbiawân âmâ hârok bunņe miawaknengiwiap.

¹³⁻¹⁴ Galalupne, hinņe Yuda luâk bo manmai ye den ire makyenęire nâņgâņet. Nâņgât kâmot

hâwât yektere biknande nâ watnekmâ âlepne aknetgât Yuda luâk bo manmai yenġât Aposolo manman. Akto âine egâlianġ kaknân meman. ¹⁵ Akto Anutuņe Israe luâk hepunyegep gât âmâ Anutuņe hân ârândânġan manmai yâk meyegep. Arekne Israe luâk meyekbiawân amâ momoņân ba golâ manbaengât miawakbiap. ¹⁶ Akto sot ulikne Anutu waņdenne mendâp benne sot hârok ârândânġ akmap. Dâ lâwin kândârânġande ârândânġ yendo gai bāt bātne gai hainâgâk ârândânġ yembiap. ¹⁷ Den ginne siâ hin makbe. Anutuņe bāt bātne bikne hârem panmâ aregât welamņân oliwa pâloņângen miawagep aregât bātne gâ Yuda luâk bo manmat oliwagât tuņe membiatgât katgekmâ dewatigegep. ¹⁸ Aregât gâne lâwin bāt bātne tâmbâne Yuda luâk yâk bo nânġayenġimenâ gembo âmâ agat agat bo akben. Hain akbâtgât hin nânġâwen. Gâ lâwin kândârâne are bo damunne akmâ heņgemgomat. Kândârâne Yuda luâk arekne ge tân gugumai. ¹⁹ Gârâmâ hin dâwerât mon? Anutuņe nânġât akmâ katmâ dewatinegâk gât bāt bātne tâmbâne are liņġâtmâ palep. Panmâ nâ dâgâm dewatinegep. ²⁰ Gâ Yuda luâk bo manmat amâ bundâk maktât. Anutuņe Yuda luâk manmai arekne bonânġani gât hârem panyegep. Dâ gâmâ Anutu nânġanmatgât kindât aregât hâkge bo mem agatmâ âmâ kânġom manben. ²¹ Amâ Anutuņe oliwa ikinġe bāt bātne bo yaigoepgât gâ hainâgâk bo yaiguguwiap. ²² Aregât gâ han kalemgât akto Anutuņe hâmbiņ yekmapgât bo nelâmġiņbiap. Hâmbiņ yegepgât den bunne hamianġi yâk yenġâlân hâuņe miawagep. Dâ han kalemņaet bunne are

âmâ gânġâlân emelâk miawagep. Aregât gâ yâkgât han kalemñaet akmâ nânġanġmâ manmenâ bunġe âlepġe miawakbiâp. Dâ hain bo akmenâ âmâ gâ gai hârem pan gekbiap. ²³ Akto bāt bātġe tâmbâġe yâkġe biwi kârikyeñaet hepunbaiân Anutuġe lâuwâġe dewatim katyekbiap gât kârikġe talaġdâpġât meyekmâ dewatim katyekto ârândân akbiap. ²⁴ Akto Anutuġe oliwa kâit menġekmâ oliwa emesa lâwinġân dopyeġe bo tatâp ain katmâ dewatim katgegepġât bo pâpkomap. Aregât oliwa emesa iġe bāt bātġe gaetġe mem dewatiyekbiapġât âmâ âiġe owâiġe akbiap.

Anutuġe Yuda luâk han kalem akyeġgiwiapġât keiġe.

²⁵ Galalupne, ye yeñaet nânġâ nânġâyeġe nânġâmbiâ humo akbopġât den ireġât keiġe makyeġgiwe. Anutuġe Israe luâk bikġe han biwiyeġe ġisapkoep. ġisapkombo âmâ beirâ Yuda luâk âmbâle bo manmai dondâ Kristogâlân dewatimbiâ âmâ ²⁶ âlepġe Anutuġe Israe luâk kâmot hârok meyekto âlepġe akmâ metewai. Aregât den Anutuġe makto Yesaiġe hin kulemgoep,

“Sion ġimbânġânba luâk siâġe heġġemgom nengiwiapġe miawakmâ Yakobo ġâlânba ġagap ġiġeġe hambuġe uruto ariwiap. ²⁷ Hain akto nâ bâleġe yeġe puliwianân ain nâ olop manbaigât makmâ hâreyeġgiwian.”

²⁸ Israe luâkġe amâ Yuda ġâtġe bo manmai yâk yeġġât akmâ pat âlep dengât ġasa manmai. Dâ Anutuġe iġe han kalemñaet akmâ kepilâ yekbiapġât akto hakulupnenġe yâk yeġġât akmâ okot

âlep dondâ akyengimap. ²⁹ Amâ Anutuŋe wan me wan nengimap are akto oloŋ nenekmap aregât pat bo hilipkombo yeukŋe akmap. ³⁰ Ye ulikŋân den koko akmâ mali akto Israe luâk yâkŋe gai den koko akmâ mali aregât Anutuŋe ye han kalem akmâ meyegep. ³¹ Hainâgâk Yuda luâk yâkŋe han kârik akmâ den koko akmâ manmâ gayi Anutuŋe ye han kalem akyengiep gât yâk gai hain kalem akyengiwiap. ³² Anutuŋe luâk hârok den konogân manmai dâm nâŋgâm heŋgemgoep aregât luâk hârok oloŋ nenekmâ han kalemŋân katnegep.

Anutu humo yâk konok mepaiŋe membaen.

³³ Yei Anutugât han kalem unsambe akto nâŋgâ nâŋgâŋe humo agat agatŋe talanmap aregât bâtgumŋe pikmâ yeanmap. Yâkŋe makmâ kepilâ kepilâ akto makmâ kotgâ kotgâŋaet keiŋe luâkŋe bo nâŋgâwâen. Dâ âi memenjaet dâp are gai luâkŋe bo ekmâ heŋgemgomaen. ³⁴ Kemputugât hanŋân den yendâp, are luâk niŋande nâŋgâep? Dâ Kemputuŋe den makmâ kindo ain niŋande dengât tângom magep? ³⁵ Dâ niŋande wan me wan Anutu wanŋo ârândâŋ agepgât hâu are kutigilanbiap? ³⁶ Amâ siâ me siâ hârok yâkgâlânba togomap. Akto yâkŋe wan me wan ketugumbo ârândâŋ akmap. Akto yâkŋe hârok damunŋe akmap. Aregât egâlian pagalenŋe yâkgâlân dewatim dewatim yem âgâwiap. A bundâk.

12

Hâknennande Anutugât sumbe akbiâp.

¹ Aregât galalupne nâ Anutugât han kalemñaet akmâ den sami makyengire nângâñet. Ye hâkyeñe Anutugât sumbe golâ kotgâm wanbiâ nângâmbo âlepñe ârândân akto ekto huraguwiâp. Hain akbai âmâ Anutu hoñ manman bunñe manañniâm. ² Akto agak memeyeñe hângâlâk nângâm manmai dop are bo akbiâp. Anutuñe hanyeñe nângâ nângâyene mem purikatberâmbo owâi akmâ nângâmbiâ humo agâkgât Anutugât han âlepñe ârândân are miawakyekto ekmâ egâlianbei.

³ Anutuñe han kalem niñep gât ye hârok makyengire nângâñet. Siâñe ikinjaet nângâmbo âgâ âgâne bo akbiâp. Anutuñe den dâtâne wan do nângando dop areâk akbiâp. Amâ ikinjaet nângâmbo humo bo akbiâp. ⁴ Amâ hin nângâñet. Hâk pânñeñe amâ konok. Dâ kei bânñeñe biwirâne âi keiñe keiñe memai. ⁵ Aregât dop hainâk nen amâ dondâ dewatienñe hâk pânñeñe konok aktâp. Aregât kei bânñe tân agu agu akmaen. ⁶ Anutuñe wan me wan keiñe keiñe han kalemñaet akmâ nengiep are ârândân tatnengiep. Aregât dopñân âi meniâm. Aregât Anutuñe den lau makmâ miawakbiapgât Anutu nânganmaengât dopñân makmâ miawakbaen. ⁷ Anutuñe hoñ manman âi nengiep amâ âi are kârikñe akmâ owâineâk akmâ membaen. Siâñe Anutugât den makmâ kepikmâ makyengimap amâ âi are membiâp. ⁸ Biwiyeñe gewop gât den sami makmap yâk aregât kârikñe yeandâpgât makbiâp. Dâ luâk siâñe âmâ galalupñe wan me wan yenjiwerâm âmâ hâuñeñe bo nângâm yân han kalem akmâ yenjiwiâp. Dâ luâk siâñe Yesugât puligât damunñe

akmâ luâk âmbâle umburuk yenjiwerâm âmâ biwi owâiñeâk akmâ dowâk tânyenjuwiâp. Bikñe kundatdâñe umatñânâk manmai are siâñe okot nânğanmâ tângowerâm âmâ mâru guru kakñân tângowiâp.

Han kalemgât den.

⁹ Han kalem agak are hâkñeak bo akbei. Siâ me siâ bâleñeet hâkân yekbiâp. Dâ siâ me siâ âleñeet âmâ egâlianñei. ¹⁰ Ye gala agak bunñe akmâ han anji goanji akñetgât kârikñe akbei. ¹¹ Konam bâlâk kârikñeâk manbei. Biwi yenñe owâiâkgât damungom manbei. Kembunenñe hon bawa agañbei. ¹² Anutuñe wan me wan katyenñiep aregât nânğâm egâlianmâ manbei. Dâ hâk hilâlâm kakñân manmâ âmâ bo hâkân akmâ manbei. Akto hokboâk hokboâk Anutu ulilanmâ dewatim mem manbai. ¹³ Kristogât luâklupñe umburuk manbai âmâ dowâk wan me wan bo talañbiap are wañbei. Akto lombo togombiâ âmâ dowâk owâiñeâk gala akyenjiwei.

¹⁴ Bikñande yenğum watyekbiâ âmâ yâk yenğât akmâ Anutu ulilanñei. Sait den bo makyenjiwei. ¹⁵ Bikñande heronje maronje manbiâ âmâ yâk olop heronje maronje akmâ tân yenğuwai. Dâ bikñande indem tâgâiak akbiâ âmâ are tânyenğum olop indewei. ¹⁶ Hanyenje mendugum kinmâ siâ me siâ konokgât han kalem akmâ manbei. Yenñeet nânğambiâ dondâ bo âgâwiâp. Nen geğenje dâmai are dowâk tânyenğum manyanjekbei.

¹⁷ Siâñe bâleñe akyenjimbo âmâ bâleñe bo agañbei. Dâ luâk âmbâle hârokñe wan nânğambiâ ârândân akbiap âmâ areâk nânğâmâk manbei.

18 Ye han kau kau akmâ luâk âmbâle hârok gala akyengim manbei. Amâ bikñande hâkângeñbiâ amâ hanâk dosane bâlâk manbe dâm gala akyengiwei. 19 Galama, bikñande kuk hengân akyengimbiâ amâ dosayeñe yeñeak bo makmâ hâreangim manbei. Kembuñe kuk are hâuñe meâkgât lângom manbei. Aregât Anutugât denñande hin dâep, “Dosa kotgâ kotgâgât ai amâ nângât. Aregât dosayeñe mem hâuñe yeñgiwian.” dâep. 20 Gârâmâ ye hin akbei. Gasagande sotgât momberân dâmbo sot wañben. Tugât nângâm dâmbo tu wañben. Gâ hain akmâ amâ kâlâp kautñân katbiat dop hainare miawakyeñgiwiap. 21 Bâleñande gâ bo mem ge katbiâp. Aregât gâ siâ me siâ âlepñe akmâ bâleñe aregât kârikñe komenâ gewiâp.

13

Kiap gawaman yeñgât den.

1 Humomolupnenñe, kiap, gawaman akto kaunsoli amâ Anutu konok arekñe luâk nengât damunnennñe manbeigât katyegep aregât nen hârok yâk yeñgât den lokoennñe ârândân agâk. 2 Aregât luâk siâñe gawaman yâk yeñgât den kom amâ Anutugât den gai kombiap. Hain akbai amâ hâuñe membai. 3 Amâ hingât. Humomolupnenñande amâ agak meme âlepñe bo mem ge katmai. Dâ agak meme bâleñe aregât hâuñe yeñgimbiâ hamewakmâ manmai. Aregât gâñe humomolupnenñe yeñgât akmâ hamep bâlâk manberâm kinmâ siâ me siâ ârândân akben. Siâ me siâ ârândân akmenâ gângât nângâmbiâ ârândân akbiâp. 4 Gawaman nenñe

amâ Anutugât hoŋ bawa manmâ tân gugumbiâ âlepŋe manbiatgât âi memai. Gârâmâ gâ bâleŋe akmâ membiat âmâ hamewakben. Yâk bugâ hanâk bo konmai. Bo. Yâk âmâ Anutugât hoŋ bawa manmai aregât bâleŋe meme luâk yâk yeŋgâlân Anutugât kuk miawakyenŋiâp dâm âi mem kinmâ hâuŋe yeŋgiwai. ⁵ Aregât den lauyeŋe lokom heŋgemgoweï. Are âmâ Anutuŋe hâuŋe nengiwiapgât hamep gâlâk bo. Amâ guge hangande mokmok membopgât hangande kau kau akbiâp.

⁶ Anutuŋe damun âi damunyeŋe agep are memaigât yeŋe gawaman puli dâtâŋe are yeŋgimai. ⁷ Aregât yeŋe yâk wan makmâ hâreyi are ârândân yeŋgiwei. Puligât dâtâŋe magi are dopŋân puli yeŋgiwei. Dâ hoŋ manmangât dâtâŋe makmâ hâreyi âmâ hoŋ manyeŋgiwei. Kâŋgo nenginet dâm hâreyi âmâ hainakmâ akyeŋgiwei. Lau nenŋe lokoweï dâm hâreyi âmâ lau yeŋe lokoweï.

Gala konok mannegât den.

⁸ Akto siâ me siâgât hâu are dowâk kotgâmbiâ bo akbiâp. Dâ hâu konok tatyenŋiwiâp amâ hin, han kalem akmâ okot anŋi goanŋi akŋetgât membiâ bo bo akbiâp. Aregât han anŋi goanŋi olop manmapŋe âmâ den kârikŋe lokomapgât dop akmap. ⁹ Anutugât denŋande hin maktâp, “Luâkdâ âmbendâgât pat bo hârewen. Gâ bugâ bo komben. Gâ kâmbu bo memben. Gala siâgât siâ me siâ are nânŋât bo dâwen.” Den kârikŋe aregât bikŋe hârok mendugum kautŋe konok katmâ hin dâep, “Gâ guge tân agumat dop hainâk luâk siâ tângowen.” ¹⁰ Han anŋi goanŋi olop manbiapŋe

âmâ galaņe bâleņe bo agaņbiap. Aregât han kalem akmâ okot âlep akyeņgiwaen âmâ den kârikņe hârok lokowaengât dop miawakbiap.

Pagaleņân manbaen.

¹¹ Akto hain akņetgât sop iregât keiņe nâņgâi. Nen ulikņân Kristo nâņgaņdenņe heņgem nenguwiapgât dâp miawaktâp. Dâ hinņe heņgem nengum metewiapgât sop ewumâk aktâp. Aregât asinâmba golâ akmâ agatbei. ¹² Hândâk pipiņe akto emet haunberâmġât hândâkgât siâ me siâ guņmâ panmâ âmâ pagaleņaet tembe mâron meakmâ manbaen. ¹³ Yanep pagaleņân manmaenņe ârândâņġâk manniâm. Are amâ sot soņgo nem muney bo akbaen. Akto tu kârikņe nem gulip bo akbaen. Akto agak meme bâleņe aņun olowâk are bo mem manbaen. Me gasa akmâ bo potalakbaen. Me siâgât nâņgâenņe bo bâliwiâp. ¹⁴ Gârâmâ Kembu Yesu Kristo yâk luguakmâ âmâ benņe hâkyeņande egâlianġ bâleņe peniaņbopġât nâņgâmâk nâņgâmâk manbei.

14

Galagât nâņgâmbiâ bo gewiâp.

¹ Galalupne, luâk âmbâle bikņande Kristo getegâk nâņgaņmai are dowâk gala akyeņgiwei. Amâ galagât heyenġienņe penânengimbiâ ain nâņgâ nâņgâyeņe gewiapgât papalakmâ manbaengât bo. ² Luâk siâ biwi kat kat kârikņe talaņmapņe âmâ sot hârok hanâk nemap. Dâ siâ biwi kat kat yeukņe talaņmapņe âmâ gârâņġâk nemap. ³ Aregât luâk siâņe sot hârok nemapņe amâ galaņe soņgo bo nemap aregât bo nâņgaņdo gewiâp. Akto

luâk songo bo nemapņe amâ galaņe sot hârok nemap are den âiân bo katmâ kotgâ aņbiâp. Amâ Anutuņe galaņe gala agañepgât. ⁴ Aregât gâ wangât Anutugât lau lokomapņe den âiân katbiat? Amâ bo ârândâņ akbiap. Yâk amâ Anutu Humoņaet enemņân kinmâ kârikņe akbiap me yeukņe akbiap. Are âmâ Kembangât pat. Gârâmâ hin nâņgâne. Humoņe âlepņe tângombo kârikņe akmâ kinbiapgât bo yeukņe akbiap. ⁵ Hainâk luâk siâ hilâmgât âi meme siâ nâņgâmbo gembo siâ nâņgâmbo humo akmap. Dâ luâk siâ âmâ âi meme hârok nâņgâmbo ârândâņ akmap. Aregât siâ me siâņe hin me hain akberâm nâņgâm heņgemgom kârigem kinmâ akbiâp. ⁶ Hilâm âi meme oyaņmâ potatmapņe amâ Kembangât akmap. Dâ Anutu mepaiņe memapgât Kembangât pat akbiap. ⁷ Aregât keiņe hin. Nengâlânba siâņe ikiņe kârikņân bo manbiap. Dâ ikiņaet akmâ bo mombiap. ⁸ Manman nenņe amâ Kembangât akmâ manmaen. Dâ mombaen amâ hainâk yâkgât akmâ mombaen. Aregât manbaen me mombaen are amâ Kembangât pat.

⁹ Akto Kristoņe momoņe akto golâ yengât kautņe akmâ damun nenņe akbiapgât mom âmâ golâ agep. ¹⁰ Akto gâ wangât gala den âiân katmâ hâkņe tunmâ akmat? Me wangât galagaet nâņgâmenâ gewiap? Nen hârok Anutuņe makmâ hârenengiwiapgât tat tatgât enemņân kinbaen aregât galagaet bo makmâ kotgâwiat. ¹¹ Anutugât denņande hin dâep.

Kembuņe hin dâep, “Nâ mandângât luâk âmbâle hârokņe nâ pâwut liginiņbai. Akto hârokņe

kotnaet nângâmbiâ humo akto makmâ mem owâiñe ketugunekbai.” dêep.

¹² Aregât nen hârok Anutugât metenân kinmâ keinenne makmâ miawakbaen. ¹³ Aregât nen nenñeâk den âiân bo makmâ bo hâk nenñe tunmâ anji goanji akbaen. Dâ hin aktenñe ârândân agâk. Galalupnenñe han gulip akbâigât wan me wan bâleñe dâpyenân bo katenñe keiyenñe bo peñ panbei. ¹⁴ Nâ Kambu Yesu olop mandân aregât hin nângâm kârigeân. Sot siâ siâ nendere amâ bâleñe bo akniñmap. Gârâmâ siânñe sot siâ me siâ ire nem bâleñe miawak niñbop dâm amâ hanâk nemiap yâk amâ bundâk bâleñe miawaganbiap. ¹⁵ Aregât gânñe galagât sotgât bo nângâm hanoko agañmenâ hanñe mokmok membiâp amâ han kalemñe pat bo akmat. Galage âlepñe agâkgât gai Kristoñe yâkgât akmâ moep. Aregât nângâm galagande sotgât nângâmbo umatñe akmapgât nângâmâk akmâ nem manben. ¹⁶ Ye siâ me siâ membiâ ârândânñ akmap are luâk bikñande nângâmbiâ gewopgât damunñe kârikñe akmâ manbei.

Sot songoñe manman kârikñe tât bo akbiâp.

¹⁷ Akto luâk âmbâle bikñe Anutunñe damun nenñe akmap sot bikñe sapa aktenñe ârândânñ akbiap dâm amâ Anutugât keñe bo nângâmai. Anutunñe damun nenñe akmap aregât keñe amâ hin. Anutunñe nenekmâ dosayenñe bo dâm ikinñe Heak nengimbo tât nengumbo Anutunñe denân bo katnenekbiap dâm heronñe aktenñe biwinenñe sândugemap. ¹⁸ Siânñe dâp are tâlim Kristo hoñ mananñe are Anutunñe ekto âlepñe akbiap. Akto luâk bikñande

gai nânğanbiâ ârândân akbiap. ¹⁹ Aregât nen gala tân agu agu akmâ kindenņe biwinenņe sândugeâkgât kârikņe akniâm. ²⁰ Gâ sotgât akmâ Anutugât âi are bo itin gulam memben. Amâ sot songo are âlepņe hârok. Gârâmâ gâ hanâk hanâk nem manmenâ galagande gekto bo ârândân akto hanņe bâlimbo âmâ bâleņe miawakğinbiap. ²¹ Gâ galagaet nânğâ nânğâņe gâlikowâtgât yâkgât akmâ songo akto wain tuņe hâkâņe akmenâ ârândân akbiâp. ²² Aregât siâ me siâ hain aregât nânğâm âmâ hangân yendâp are Anutugât metenân mem manmenâ gugaet biwigânâk yembiâp. Aregât siâņe ikinjaet nânğâmbo ârândân akto âmâ ikinņe den âiân bo kalakto biwiņe sândugembo heronņe akmap. ²³ Dâ siâņe sot songo hanokoagân nendo bâliwiap. Amâ hingât. Yâk Kristo nânğanđo huraguepgât bo nânğâm nemap aregât. Akto siâ me siâ are biwi kat kat olop bo aktenņe dosanņe olop akbiap.

15

Yesugât nânğâ nânğâ watmâ manbaen.

¹ Galama, kârikņe olop manmaen nenņe âmâ yeukņe manmai are sokom katyektenņe ârândân akbiâp. Sokom katyekmâ âmâ nenjaet nânğâ nânğâ nenņân bo maniâm. ² Nen galalupnenņe yâk yenğât nânğâmâk âlepņe akņet akto Kristo nânğanbiâ humo agâkgât tânyenğuniâm. ³ Aregât keiņe hin. Kristonņe âmâ hainâgâk ikinņe ukenņe bo walep. Dâ Anutugât denņande hin maktâp, “Anutu, gâ hâkâņe dâm dâyi yâk yenğât den are nânğât kaknân âgâep.” dâep aregât den walep. ⁴ Are tâmbâņe dondâ den makmâ kulemgoyi

are Anutugât keiŋe nâŋgâm heŋgemgone gât kulemgoyi. Anutugât kulemŋe hârokŋe mem kârikŋe mânginenekmâ mem owâinenekto siâ me siâ nengât pat dâtâŋe nâŋgâenŋe biwinenŋe owâiwiapgât kulemgoyi.

⁵ Anutuŋe kârikŋe aknengimapgât akto mem owâinenekbiap gât amboŋande akyeŋgimbo Yesu Kristogât dopŋân han nâŋgâ nâŋgâ konok akmâ manbaigât ulilanđân. ⁶ Ulilanđere akyeŋgimbo han biwiyeŋe mendugumbo Kembu Yesu Kristo yâkgât Eweŋe Anutu mepaiŋe mem manbai. ⁷ Aregât Anutugât kotŋe humo agâkgât Kristoŋe meyegep dop hain âgâk ye gala aganŋim manbei. ⁸ Aregât hin makyenŋiwe. Anutuŋe hakulupnenŋe den pat âlepŋe makmâ heŋgemgom makyenŋiep are bunŋe miawagâkgât Anutuŋe amâ den bunŋeâk makmap a hârok nâŋgânjetgât Kristoŋe Yuda nengât akmâ hoŋ bawa aknengiep. ⁹ Hain aknengim amâ Yuda luâk âmbâle bo manmai yâkŋe Anutuŋe han kalemŋaet akyenŋiepgât mepaiŋe mem heroŋe aganbiâ kotŋe agatbiâp. Aregât Anutugât denŋe bikŋe hin tatâp,

“Nâŋe Yuda luâk bo manmai yâk yeŋgât hutyeŋân kinmâ mepaige mem kinmâ kep kom kotge patŋe makmâ egâlianbian.”

¹⁰ Akto den siâ hin tatâp,

“Yuda luâk bo manmai yeŋe Anutugât kâmotlupŋe olop makmâ heroŋe maroŋe akbei.”

¹¹ Akto siâ hin,

“Yuda luâk bo manmai ye hârokŋe Kembu makmâ mepaiŋe membei. Dâ luâkŋe luâkŋe hârokŋe yâkgât akmâ owâiŋe aganbei.”

¹² Akto Yesaianje hin kulemgoep,
 “Lâwin penâne Yesegât kâmne siâ miawakmâ
 yâkne Yuda luâk bo manmai damunyeje akto
 nânğanbiâ biwiyene owâine akbiap.”

¹³ Galama, Anutuje biwi owâi aknengimapgât
 Amboje yeje nânğanigât akmâ wâtjande
 totokoyekto herone marone nânğâmbiâ biwiyene
 sândugembo Heagât kârikneje yengimbo
 himbingât nânğâm owâine akmâ manmâ
 âgâwaigât ulilandân.

Paulone âi âlepnaet mâruje agep.

¹⁴ Galalupne yeje han kalemyene yendâp are
 akto Anutugât keje âlepne nânğâm hejngemgoma
 aregât yepak mem kârigeakbaigât bo pâpkowai. Are
 keiyene nânğâm hejngemoân. ¹⁵ Hain nânğân
 gârâmâ hanâk Anutuje han kalemnaet nijepgât
 den bikne meteâk kulemgom kinmâ Anutugât
 keje nânğayengiân. ¹⁶ Yesu Kristone Yuda luâk
 bo manmai yâk yengât akmâ âi membiangât
 wâtje nijep. Aregât akmâ Anutugât pat âlep
 denjaet sumbegât âi mendere Heakne hanyenân
 han kâmdâk katyengimbo Kembangât sumbe ak-
 biâ Anutuje ekto ârândân akbiap. Amâ Yuda
 luâk bo yâk yengât. ¹⁷ Aregât Anutugât âi me-
 man are Yesu Kristogât akmâ nânğare agat agat
 akmap. ¹⁸ Âi are âmâ nunaet kârikjân wannande
 membom. Bo. Yesu Kristone Yuda luâk bo
 manmaine Anutugât lau lokowaigât wâtje nijep
 aregât âi mem makyengiman. ¹⁹ Akto kulem bo
 egekne keje kejaet kârikne akto Heagât kârikne
 aregât akmâ Yerusalem kejianba Kristogât keje
 makmâ hân hârok ândeanmâ makmâ sambelem

arire Ilurikonj hânân ârândânj agep. ²⁰ Hain akmâ luâk biknje yengât âi kalamân gaetnje membomgât Kristogât keiñe bonângâmai ain kâriknje akmâ makyengiwerâm aktere humo akmap.

Paulone Roma kepia ewangim Sipen ariwiapgât magep.

²¹ Anutugât denje biknje hin tatâp. Aregât dopjân akman,

“Siâñe yâkgât pat bo makyengimbiâ manmâ gayi yâkñe yâk ekbai. Dâ yâkgât patñe bo nângâm gayi yâkñe yâk nânganbai.”

²² Den aregât akmâ yengâlân togowerâm kindere sop ârândânj wan me wan siâñe dâp tigininep. ²³ Dâ manmâ gan ain yengâlân togowerâm hannande nângâm malân aregât akto hân iregen âine bo tatniñdâpgât. ²⁴ Sipen hânân ariwerâm akmâ yengâlân togowerâm nângân. Togom ye olop makmâ kârikñeâk tân agum akmâ dâp hengemgom katnekbiâ hepunyekmâ owâineâk Sipen hânân ariwian. ²⁵ Gârâmâ hinñe âmâ Yesugât kâmot Yerusalem manmai yengât akmâ puli mem arim yengiwerâm aktân. ²⁶ Amâ hingât. Makedonia hân akto Akaia hânân gâtñe Yesu nânganmaiñe, Yesugât kâmot Yerusalem kepien umburuk manmai yâk tânyenguwerâm owâim puli kali. ²⁷ Amâ han kalem yeñaet akmâ katbiâ ârândânj agep. Yuda luâk bo manmaiñe amâ Yesugât den pat amâ Yuda luâk yâk yengâlânba nângâyigât hâñe potatmâ yengimbiâ ârândânj akbiâp. Hain dâm herone akmâ puli kali. ²⁸ Puli katbiâ huraguep are mem Yerusalem kepien arim yengire bo akto Sipen hânân ariwiangât yengâlân

son togowian. ²⁹ Aregât hin nânġân. Nâ yeŋġâlân siâ me siâ bâlâk bo togowian. Kristoŋe meme akniŋmap are mem togom yeŋgire nânġâm âmâ heroŋe maroŋe manbai.

³⁰ Galalupne, Kembunenŋe Yesu Kristogât akmâ akto Heakgât han kalemġât akmâ ondop pâroŋ den makyenġiwe. Ye nânġât akmâ nâ olop Anutuŋe tânnuguâkġât wârakmâ Anutu ulilaŋbaen. ³¹ Ye nânġât ulilaŋbiâ âmâ Yuda hânân ġâtŋe Anutu bonânġanmai arekŋe menekbâigât Anutuŋe bâtyenânba mem oloŋnekbiap. Akto Yesugât kâmot Yerusalem ain manmai yeŋġât akmâ puli kali are mem yeŋgire ukenŋe agâkġât ulilaŋbei. ³² Hain ulilaŋbiâ Anutuŋe nânġâyeŋġim meme akniŋdo heroŋe akmâ yeŋġâlân togom tatere biwi owâiâk akniŋbai. ³³ Anutu lumbe Amboŋe âmâ ye olop manbiâp. A bundâk.

16

Pauloŋe Roma yeŋġât nânġâyeŋġim malep.

¹ Galalupne, âmbâle siâ kotŋe Poibe yâkŋe Yesugât kâmot Keŋkerei kepien manmai tânyenġum manmap. Yâkŋe yeŋġâlân togombo ye dowâk gala aġanbai. ² Gala aġanmâ Kembuġât akmâ âmbâle arekŋe nâ akto bikŋe dondâ hoŋ bawa nengiep areġât wan me wan bo talaŋbiap are dowâk mem waŋmâ tângowei. ³ Akto luâk âmbâi lâuwâ Akuila akto Pirisila Yesu Kristogât âiŋaet tân nugumandat yâk maŋan yelekŋet. ⁴ Yâk lâuwâ âmâ nânġât akmâ âi humo mem hâk hilâlâm nânġâm bâsok moyiat. Aregât nâŋeak bo, Kristogât kâmot Yuda bo manmai kâmotnenŋe yâk

yetgât okot âlep nângâyetkim manden. ⁵ Yâk yetgât emelan Kristogât kâmot mendugumai are nângât akmâ mangan yekbei. Akto galane siâ kotņe Epaineto Asia hân humo ain ulikņân akmâ Kristo nânganņep yâk gai manganbei. ⁶ Akto âmbâle kotņe Mariane yengât akmâ âi humo miep aregât yâk gai hainâk manganbei. ⁷ Akto nângât kâmolân gâtņe lâuwâ Androniko akto Yunia ulikņân nâ Kristo bo nânganņân sop ain nânganņiat. Akto beirâ tembe lokone hiko negi sop ain hainâk katyelekbîâ nâ olop talion. Hain akmâ manmâ gambela nen Aposolo manmaen nenņe yâk yetgât herone akmaen aregât nângât makyetkiwei. ⁸ Akto nâ Humogât akmâ luâk siâ kotņe Ampiliato yâkgât okotne nângân aregât manganbei. ⁹ Akto Urbanone Kristogât âi meyionân olop miep yâk akto galane Sitaki manganyelektân gât makyetkinet. ¹⁰ Apelene Kristogât akmâ âi humo mem bo hâkân agep are nen hârok nângâenņe ârândân agep yâk akto Aristobulo yâkgât kâmot gai mangan yekbei. ¹¹ Akto Yuda luâk galane Herodiongât akto Narikisogât kâmot bikņe Humogât akmâ manmai yâk yengât nângâre âgâp aregât mangan yekbei. ¹² Akto âmbâi lâuwâ Tiripaina akto Tiripose Kembugât akmâ âi humo mem mandat, yâk akto âmbâle siâ Peasi arekņe Humogât âi mem hâk hilâlâm nângâep yâk hârok mangan yekbei. ¹³ Kembuņe luâk siâ kotņe Rupu oloņep yâk akto yâkgât memene dop akmâ tân naguep yâk lâuwâ lâuwâ mangan yelekņet. ¹⁴ Akto luâk kotyene Asinĳkrito, Pilegoņ, Hereme, Patoroba, Herema akto Anutugât kâmot bikņe olop manmai yâk

manjanyeknet. ¹⁵ Akto luâk âmbâi lâuwâ Pilorogo akto Yulia akto luâk siâ Nereo akto gariŋe akto luâk Olumpa akto Kristogât kâmot yâk olop manmai yâk hârok manjan yeknet. ¹⁶ Yekai hainâk Kembugât akmâ bâtyeŋe koanŋiŋet. Akto hânŋe hânŋe Kristogât kâmot yâkŋe yeŋgât nânŋâ yeŋgim mandâi.

Miti luâk hianŋim yeŋgât sami magep.

¹⁷ Galalupne, yeŋgât hutyeŋân gâtŋande ye umatŋân manmâ potalakbaigât gâlikoyekberâm akmai luâk are yeŋgât nânŋâm heŋgemgom damun akmâ hamep akbei. Yâkŋe Kristogât keiŋe ye nânŋâ meteyi are mem gulip kowerâm manmai aregât hamiyenŋim yâk bonânŋâ yeŋgiwei. ¹⁸ Luâk hain arekŋe Kembu nenŋe Kristo hoŋ bawa bo agaŋmai. Amâ yeŋaet tep yeŋaet nânŋâmbiâ agato aregât hoŋ agaŋmai. Akto luâk âmbâle biwiyenŋe bo damunŋe akmai yâk makyenŋim mulun yekmâ heyenŋimbiâ biwiyenŋe gulip akmap. ¹⁹ Dâ ye âmâ Kristogât den lokomai aregât patŋe kepia ârândân sambelem arimbo nânŋâm meteyi aregât yeŋgât akmâ heronŋe akman. Heronŋe akmâ âmâ yeŋgât han kau nânŋâm hin akŋetgât makyenŋiwei. Siâ me siâ âlepŋaet biwi owâi kakŋân manbei. Dâ siâ me siâ bâleŋande hâwât yekto âmâ bo nânŋanbei. ²⁰ Ye hain akmâ manbiâ âmâ sop kêlep bo aktoân Anutu biwiyenŋe sândugeâkgât ambonande Niambi keiyenŋe amukŋân hâkokombo tâliwai. Kembunenŋe Yesu Kristogât han kalemŋe yeŋgâlân yembiâp.

Gala den.

21 Galane Timoteo bāt tângone akto Yuda kâmotlupne yengâlân gâtne Lukio, Yason, Sosipate yâkne yengât nângâyengiâi.

22 Akto nâ Teatio, nâ kulem ire Paulone makniᅇdo kulemgoân nâne Kembugât akmâ nângâ yengiân.

23 Gaione nâ Paulo akto kâmot hârok in tân nengumap hainâk yengât nângâ yengiâp.

Akto luâk Erastone kepia iregât puli damunne akmap akto gala nenne Koato yâkne hainagâk ak-tat.

Anutu akto Nanne Yesu yetgât kot humo.

24 Kambu nenne Yesu Kristo yâkgât han kalemne yengâlân yem âgâwiap. A bundâk. 25 Anutugât pat âlep makman akto Yesu Kristogât kot makmâ sam-beleman, aregât dowân Anutune tânyenguwiapgât bo pâpkomap. Akto kârikne meyekbiapgât kârikne talaᅇdâp. Anutu manman kârikᅇaet denne amâ yoᅇâk yem gam malep amâ hinne miapᅇân mi-awagep. 26 Anutugât propetelupᅇande Anutugât den keᅇne kulemgoyi talep are hinne Anutu man-man kârikᅇe Amboᅇande makto hânᅇe hânᅇe sam-belem ariep. Amâ hânᅇe hânᅇe manmainᅇe Kristo nâᅇgaᅇmâ Anutugât lau lokowai gât Anutune makto miapᅇân sambelem ariep. 27 Aregât Anutu ikeᅇne han nângâ nângâ humo talaᅇdâp konok are Yesu Kristogât akmâ egâlianᅇe humo makmâ agaᅇdenᅇe yem âgâwiâp kârikᅇe. A bundâk.

Yusugât Pat Âlep Den
The New Testament in the Timbe Language of Papua
New Guinea
Nupela Testamen long tokples Timbe long Niugini

copyright © 1987 Wycliffe Bible Translators, Inc.

Language: Timbe

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-10-23

PDF generated using Haiola and XeLaTeX on 22 Feb 2024 from source files dated 31 Aug 2023

03f82704-6ad1-5094-a78e-e240d9f2d4f8